

## ***ASO LUA, 24 IANUARI 2023***

*Na nofoia e le Fofoga Fetalai le Nofoa i le itula e 9:27 i le taeao.*

Tatalo.

**FOFOGA FETALAI:** Ou te faasilasila atu ua toe amatalia nei Taualumaga a le Fono Aoaofaitulafono.

O se laolao leni ou te muai faatalofa atu ai i le paia o le Palemene i leni taeao, i le afio o lau Afioga i le Sui Palemia, afio Afioga i Minisita o le Kapeneta, tainane Afioga i Minisita Lagolago, afio foi lau Afioga i le Sui Taitai o le Itu Agai ma le mamalu o sui usufono uma o le Palemene.

Malo afua ailao ua maua i le alofa ma le agalelei o le Atua. Ua tatou toe fesilafai i le manuia aua le toe faaauauina o le tatou galuega, malo le soifua manuia.

E faafeiloai atu foi i le paia o le tapuaiga a le tatou Maota i le maualuga ua mafai ona tatou faatasi i leni taeao, malo le lagi e mama. Talofa Samoa i lau faafofoga tapuai mai, matou te faatulima atu i leni taeao. Tapuai maia ma le manuia, ia manuia le usugafono a le Palemene i leni taeao.

## **TUUIINA ATU O PEPA**

*Na tolaulauina e le Failautusi i le Fono Aoaofaitulafono le faasologa o Pepa e tusa ai ma T.T.49(2).*

1. P.P.2022/2023 Nu.142, Lipoti Faaletausaga a le Falemeli o Samoa mo le Tausaga Faaletupe 2021/2022;
2. P.P.2022/2023 Nu.143, Tali a le Malo i le P.P.2022/2023 Nu.49, Lipoti a le Komiti o Tupe Maua ma Tupe Totogi i le P.P.2020/2021 Nu.99 ma le P.P.2021/2022 Nu.27, Lipoti Faaletausaga a le Faalapotopotoga o Mea Tau Fale a Samoa mo Tausaga Faaletupe 2019/2020 ma le 2020/2021;
3. S.R.2023/1, Tulafono Faatonutonu o le Pueina o Ata Tifaga (Kamupani o le Landing Limited) 2022.

Ma le faaaloalo lau Afioga.

**TULAFONO TAU FAAOFI O LE FAATATAUINA O TUPE  
FAAOPOPO (NU.1) 2022/2023 – felafolafoaiga faaaauu i luga o le  
faitauga faalua – Aso 5**

**FOFOGA FETALAI:** E tolopo felafolafoaiga i le aso Faraile i le vaiaso na se i mavae atu nei ua maea saunoa le sui usufono mo Faasaleleaga 4.

Ia o le avanoa lenei mo se isi sui usufono mamalu e fia saunoa.

Faafetai, o lea ua matau atu o lea ua fou mai le sa o le Afioga i le Minisita Lagolago, o le sui usufono mamalu mai Safata 2. Ia, o le avanoa lenei o lau Afioga i le sui usufono mamalu, lau Afioga i le Minisita Lagolago.

**Afioga LAUMATIAMANU RINGO M. PURCELL (Safata 2):** E momoli le agaga faafetai i lenei taeao fou i le alofa ma le agalelei o le Atua o lea ua tea mea i Matautusa, ua e momoli foi la tatou faasagi ma le faapolo i le Atua e ala i lenei taeao Ae ofo faatalofa atu lenei usugafono i lau Afioga i le Fofoga Fetalai faapea foi lau Afioga i le Sui Palemia o lo o tu i le foe ma taitai o le tatou Malo i lenei vaitau. E faatalofa foi i Minisita o le Kapeneta i alii ma tamaitai, o sui usufono tofofi mai itumalo, talofa i lenei taeao. E faatalofa foi i le vasega o Minisita Lagolago.

E faatulou foi ma faatalofa i lau Afioga i le Sui Taitai o le Itu Agai ma sui usufono mamalu uma o le Palemene. E faatalofa foi i lau Afioga i le Failautusi ma lou Soatau, ma le mamalu o le vasega o le Maota Fono nei.

Ia, e ofo faatalofa foi i Ofisa Sili o Pulega o Matagaluega taitasi a le tatou Malo, ae faapea foi Faalapotopotoga Tumaoti.

O se avanoa lelei foi ou te faatalofa ai i si ou itumalo pele o Safata 2 po o Safata i Sasae, mai lava i Niusuatialemanu seia paia Niualama. O le paia lava lea aua alo o Satunumafono ae faapea foi le latou Faaluuluga, Tapaau na tausi e le Alataua, Taulauniu ma Aitutagata, le mamalu i le Alataua, ae faapea le nofo a tula ia Safata. Talofa talofa lava.

A o lenei taeao ou te tulai ma le ava tele ma le faaaloalo se i fai foi se manatu a o se lagona i le tulaga foi o le tatou Tala Faatatau Faaopoopo Muamua o le Tupe o lenei tausaga 2022/2023.

Ia, o le a ou amata mai i le Minisita o Faatoaga. E momoli le agaga faafetai i lenei vaiaso sa faatinoina ai le sector plan a le Matagaluega, vaaia lava le naunau o lau Afioga ma le Matagaluega ina ia tatou tua lava i mea o lo o maua i totonu o si o tatou atunuu, e le gata i le eleele, a o le sami foi aua le fofoga taumafa o si o tatou atunuu.

E momoli atu le agaga faafetai ona o le faatofalaiga mai lava i lenei tausaga seia paia le 2027. E momoli atu ai le agaga faafetai i tulaga foi o uluai seleselega ma tulaga ma polokalame o lo o faatinoina e le Matagaluega. E tasi lava le fautuaga foi ma le tilotilo foi a lenei usugafono ona o le tulaga o i ai le laau lea o le niu, e pei o le tulaga lava lea i lau vaavaai ma le tilotilo, o le vaitau o le kerisimasi, ou te iloa e oo mai lava i

le taimi lenei ua oo le niu i le \$10 i le niu. A o lau vaavaai ma lau tilotilo, ia, o le tasi lea o mataiai a si o tatou atunuu. A o le vaavaai e le mafai lava ona tatou aveesea le faamai o le niu i ona tulaga foi o lo o afaina ai le tele o niu. Aua o tua atu o le Maota lenei, a silasila i ai i le tulaga o le niu o lo o i ai, ua matua faatamaia lava i le manu ainiu.

I le fautuaga la a lenei usugafono i lau Afioga i le Minisita, e le faatonuina, ae na ona musumusu atu i se isi vaega foi o polokalame a le tatou Matagaluega ina ia silasila i lea faafitauli ua fai si umi o tatou mafuta pea ma le manu ainiu, po o le a se isi vaega, aua masalo e oo atu i le faaiuga o le tausaga lenei ua sioki le niu, ia iu lava i le \$20 i le niu. A o le tulaga lena, o se tasi lea o income po o le alagatupe maua foi a aiga o le niu. Ae a tilotilo foi i le tulaga o i ai le tatou manu ainiu, e i ai lava le popolega, e le toe maua se niu i le lumanai.

Ona oo mai lea o se faasoaga agai i le Minisita o lo o vaaia a tatou galuega faavaitaimi. O le vaavaai i ai, e tele lava se faamanuiaga e maua, siitia faamanuiaga mo aiga, e le gata i seleni, o nisi foi o aiga ua mafai ona fai maota, maua taavale, ia ma tulaga lava o le soifuaga nei. Ae i ai lava le popolega o lenei usugafono i le tulaga foi o lea ua taofi a tatou galuega faavaitaimi. O le tatalo a lenei itumalo, ia alofagia ia fai lelei ni aiaiga mo i latou o lo o malaga i ia galuega. Aua o le popolega, o le a le galueaiina ai o tatou eleele. E i ai lou popolega ma lau vaavaai i lou itumalo mo se faataitaiga, ia ua tele ina o i fafo i latou ua le mafai ai ona galueaiina le eleele. A fua la i le manulauti ma le vaavaai i le Matagaluega o Faatoaga, ia, ua le mafai ona gafatia le faatinoina o le atinaeina o tatou laufanua. O le popolega lena. Ma e aliali mai ai ma oo ai le tatou atunuu i le olaga o le oge, ona ua tau leai i latou e galueaiina o tatou eleele. E le na foi ma le laina le silasila a outou Afioga i sui usufono mamalu uma o le Palemene, ia o totonu o supamaketi, o totonu foi i galuega i le tele o galuega, ia ua tatou vaaia atunuu eseese o lo o galulue ai. O le popolega i le toe foi mai, ia, o le a i ai nisi vaaiga ua le toe i ai se Samoa i totonu o galuega. O le vaaimamao lena a lenei sui usufono, aua o lo o faapena ona tapenaina nisi taiala e taialaina ai le galuega i le lumanai. Faafetai foi i le Matagaluega o lo o nafa ma lea vaega, se i silasila i nisi aiaiga e puipuia ai o tatou tagata, e le gata ia i latou o lo o galueaiina le eleele, a o i latou foi e i ai faailoga faapitoa ma tomai faapitoa i tulaga foi o galuega ma le economy o si o tatou atunuu. Ia, afai nei e o i fafo, e tataua ona i ai se papuipui i tulaga ia, e le gata i le taofiofia o i latou e i ai le tomai aua le atinaeina o si o tatou atunuu, a ia malupuipuia foi mai isi faafitauli o lo o alia'e mai, e pei ona tatou molimauina.

Lau Afioga i le Minisita po o lau Afioga foi i le Sui Palemia, ou te iloa le tatou polokalame foi lea sa talanoa ai atunuu e lua po o le Ao o Samoa. Ou te maitauina ua tele lava nisi mea ua faaopoopo e pei o le tulaga foi lea i le talosagaina o pemita agai Tutuila. O lau vaavaai ma lau matau i tulaga o

lea ua taumafai atu e fai lipoti a leoleo, fai lipoti a falemai, ae sa leai ia vaega i taimi ua sola ma tausaga ua alu.

O le vaai la a lenei sui usufono, e pei ua tele nisi mea ua faafaigata ai ona apalai o tatou tagata ma pemita tatou te malaga ai i fafo, ae po o i ai foi ni a tatou aiaiga e talosaga mai latou ia tatou, ia e avatu foi ni tulaga faapena. Ae i le talitonuga o lenei sui usufono, ia maua se avanoa e faamalamalama ai ia vaega, leaga o lea e faafofoga Samoa, ia e aoga foi ona malamalama i mea na tua i ai talanoaga foi a Malo e lua, ina ia oo mai le taimi e malaga ai, a o malamalama foi i le tulaga o i ai le tatou pemita, aemaise o le tulaga foi lele o le Talofa Pass po o fai lava. Aua e i ai le talitonuga, o ia mea e le atamamai uma tagata i computer, e faapena lava ona tau sue ma faafaigata ai i o tatou tagata le malaga atu ma le malaga mai.

Lau Afioga i le Minisita o Tupe, e momoli atu le agaga faafetai i lau Matagaluega ona o le faatulagaina foi o le tatou Tala Faatatau Faaopopo o le Tupe i tupe fetuunai, ina ia mafai ona faatino galuega e tatau ona faamuamua. E momoli le agaga faafetai i lau Afioga i le Minisita ma le Matagaluega ona o le tomai sa faatino ai lea faamoemoe, ma e lagolagoina foi e lenei itumalo le tatou Tala Faaopopo o le Tupe 2022/2023.

Lau Afioga i le Minisita o Galuega, lau Afioga i le Minisita, ia o lau Matagaluega o lea foi ou te Minisita Lagolago ai, ae le mafai lava foi le vaavaai i tulaga foi o lo o i ai le Matagaluega i ona tulaga faatino ma galuega e mafai ona faatino mai lea aso i lea aso. I le matau lau Afioga e ui atu i le Afioga i le Fofoga Fetalai, o tatou saogalemu. Aua ou te talitonu lava o le matafaioi tonu lea a le tatou Matagaluega i le safety on the road. E maitauina lava i a tatou konekarate, e tatau ona faamallosia le tulaga foi o faailoilo ma tulaga faapena i luga o auala televavave. E i ai isi konekarate e tu i i le cone ma e vaai atu i le tagata moavao. O tulaga foi ia e tatau ona faailoa pea i konekarate le latou matafaioi, aemaise o moli e faaoga ia ota iloa mamao atu ae ta te le i oo atu i le vaega o lo o faatulaga ai ia vaega. Ia, e le gata i konekarate, a o le Matagaluega lava ia i le EPC, o le vai, o nisi Matagaluega o lo o i lalo o lau vaavaaiga lau Afioga, i lata lava vaai e le o lelei ona faatino ia vaega, e tatau ona faaleleia aua le saogalemu o tatou femalagaai. E faapena foi kamupani moavao, a uma lava ona moa le vao o ae le salua le otaota, e paepae solo lava lapisi.

**Afioga Sulamanaia Fetaiai Tauiliili Tuivasa (Vaimauga 1):** Lau Afioga i le Fofoga Fetalai, pe maua se avanoa...

**FOFOGA FETALAI:** Ia malie le sui usufono mamalu, se i... o le a le mafuaaga ma le faaaloalo...

**Afioga Sulamanaia Fetaiai Tauiliili Tuivasa:** O se mea fia faamalamalama lau Afioga. Lau Afioga i le Fofoga Fetalai, e faatalofa atu i

lenei taeao i le maleifua mai i faguga lelei le paia o lenei Maota. E momoli foi le agaga faafetai i le fonotaga foi i le vaiaso ua tuanai, ia o lea foi ua toe oo i lenei vaiaso. Faamalo i lau Afioga i le Fofoga Fetalai mo le taitaiga o lenei Maota aemaise foi lenei Itu.

Ae o lou tulai ona o le tulaga lea ua saunoa i ai le sui usufono po o le Minisita Lagolago a le Matagaluega o Felauaiga po o le LTA po o Galuega Tetele. Ia o lou agaga lau Afioga i le Fofoga Fetalai, o le Minisita Lagolago, sa faapea ita, o lea e taumafai lenei Maota ma lau Afioga ina ia pasia le tele o tatou tulaga ua i ai lenei Maota. Sa ou faapea o le taeao lenei e tali ai lenei foi Itu ma... a o Minisita lava o le latou lava vaega, aemaise foi o le sui usufono lea lau Afioga o le sui o le Vaega lea o Tupe, Komiti o Tupe.

Ia pei o lenei e avatu ai le tuualalo, ae pei o lea ua toe fautua mai lava i lana Minisita. Ia, e pei o le agaga lenei e tau faanoanoa ai. O lau lava tuualalo, o le laua Matagaluega ia e tuualalo lava ia i totonu o le lotoifale ma... o laua uma lava na o le Minisita, o ia foi, ae pei o le agaga lenei o lea ua toe lauga mai, a o lea e pei o le vaega lenei e avatu ai se manatu.

**FOFOGA FETALAI:** Ia, faafetai. O lea ua maua atu le agaga o le sui usufono mamalu. Silasila foi, e le o taofia lava e le Maota i sui o le Komiti i nai avanoa foi ia e maua ai foi o latou sao i nai o latou itumalo ma molimoli mai foi nai feau ma talosaga. O le avanoa o lea e tuu atu e le Nofoa, o avanoa tutusa uma lava mo sui usufono mamalu o le Maota. E le o faailogaina foi lea Itu po o lea Itu. Aua o sui usufono lava foi o le Komiti o lea Itu, o lea lava e tuu atu i ai avanoa.

Se i tulai mai lau Afioga i le Minisita o Galuega Tetele.

**Tofa Hon Olo Fiti Afoa Vaai (Minisita mo Galuega, Felauaiga ma Atinae Eseese):** Faafetai tele atu mo le avanoa. E faalogologo foi ma le totoa i le saunoaga a le Afioga i le Minisita Lagolago, ia e faafetai atu foi i le sui usufono mo le faauilavea.

Ae manatua foi lau Afioga i le Fofoga Fetalai, e moni lava o lo o Minisita Lagolago le Afioga i le sui usufono mo Safata, ae o le tele o le taimi lea o lo o galue ai i totonu o le Palemene, e le o lava foi se taimi ma te faasoa ai ma tulaga faapea.

Ae faalogologo atu lava ma le totoa i le tulaga o le mataupu o lo o laga, o se mataupu e taua tele. E faapea la ua le o lagaina mai e nisi o sui usufono mamalu o le Maota, a o le mataupu lea, ua matuai ou fiafia lava i le faalogologo atu i le Afioga i le Minisita Lagolago, e taua le saogalemu o tatou tagata i luga o le laueleele, lea la e aumai ai le mataupu lea.

A o le mea foi le tatou Palemene, e tuusaoloto lava Afioga i sui usufono i o latou finagalo faaalua, ae matou faalogologo atu ona tau tuu atu lea o se tali mulimuli. Ma le faaaloalo.

**FOFOGA FETALAI:** Ia, ioe, pei o le avanoa lava lena ia maua uma mai foi e sui usufono mamalu le tulaga aloaia la e i totonu o le Maota, o le saolotoga o sui usufono mamalu e faaali ai o latou finagalo. O le mea lea, ou te talitonu foi ua lava lo outou silafia i totonu o le Maota, aemaise foi o le tulaga aloaia o sui usufono mamalu i totonu o le Maota. E moni lava o Minisita Lagolago, ae ona o lo o tulai mai foi i o latou itumalo.

O le mea lea e faamalie atu foi i le faauilavea. A o lea foi e faafogafoga mai le sui usufono mamalu, ia tatou galulue faatasi i se auala e faapena ona... pau lava le mea ia maua le feau taua aua le manuia o itumalo. Ia se i tulai mai le sui usufono mamalu e faaauau mai le saunoaga.

**Afioga LAUMATIAMANU RINGO M. PURCELL:** Faafetai i lau Afioga i le Fofoga Fetalai. Ia, e faamalulu atu foi i le sui usufono, ia o matou lava lagona e fatufatu ai o le tatou galuega lea na ala ai ona tatou omai i le Maota nei, tatou te lafoaso faatasi aua se manuia o le tatou atunuu.

Lau Afioga i le Minisita o Galuega, ia, pei ona talanoa atu i le tulaga foi o galuega o lo o faatino i konekarate, tasi lea matafaioi i le matou vaavaai o le quality o galuega o lo o faatinoina. Aemaise lava mea nei o aids o lo o aumai e atunuu i fafo po o tatou tagi ona aumai lea o le faatagaga latou te faatinoina ai ia vaega.

O le a avatu se faataitaiga o le tatou Maota lea e fai ai galuega ma aoaoga a le Maritime i Mulinuu. O le fale lea ou te iloa e le i atoa se 10 tausaga. A silasila i ai lau Afioga i le Minisita ma i latou foi o lo o pasiaina galuega, ua tutulu, ua matua tutulu lava o le fale ua le o toe sefe foi mo fanau aoga. A o le matau a lenei sui usufono, e tatau ona galulue ia aids nei i standards o lo o fai ai tatou fale i inei, aua e moni lava o meaalofa, ae tatau lava ona i ai se vaavaai foi a le Matagaluega i le tulaga i le quality o galuega. Aua o le mea lea e maua, e fialia tatou e talia foai ma fesoasoani mai, ia ae 5 tausaga ua toe leaga, e tele foi tupe a le tatou Malo e toe faaalu i le toe faaleleia o ia vaega.

O itu ia e logo atu ai lau Afioga se i silasila i ai le Matagaluega, aemaise o i latou o lo o faatinoina lea matafaioi.

Ona ou oo mai lea lau Afioga...

**FOFOGA FETALAI:** Malie lava lau Afioga i le sui usufono mamalu, se i tulai mai le Afioga i le Minisita o Galuega Tetele. Lau Afioga i le Minisita.

**Tofa Hon Olo Fiti Afoa Vaai:** Faafetai atu lau Afioga i le Fofoga Fetalai mo le avanoa, faafetai foi mo le mataupu ua laga. Ou te manatu i le taimi nei talu ona amata le tatou faigamalo fou nei, e le i i ai se tulaga o galuega foi nei e faatupe mai fesoasoani mai fafo. Ae i ai lou talitonuga ma

sa ou iloa mai foi mai nai tausaga ua tea, e i ai lou talitonuga o galuega faapenei e faatupe mai fafo, e aumai ai lava conditions o donors latou te faatinoina ai galuega uma ia ma tulaga uma faapena. Sa fai lava foi le faasea i lena foi vaitaimi i le faigamalo talu ai, ma ua ou malamalama ai foi i lena vaitaimi, o galuega ia e pule lava atunuu e aumai ai fesoasoani, e pule foi latou i a latou standards foi ia e fai ai galuega. O le mea lea ou te faamalulu atu i le afioga i le sui usufono mamalu, e taua lou finagalo o le a silasila totoa i ai le tatou faigamalo. Ae pei o le ala lena, e pei ona ou fai atu, e tatou te aisi, ae pule mai lava latou.

Ia pei o le tala atu lea ma le faaaloalo.

**FOFOGA FETALAI:** Tulai mai lau Afioga i le sui usufono mamalu e faaauau mai le saunoaga.

**Afioga LAUMATIAMANU RINGO M. PURCELL:** Faafetai mo le tali manino, ae aoga foi na ona tuu atu i ina i lau Afioga e silasila ai i le lumanai. E pei o tulaga ia e popoe i ai lenei sui usufono o le aumai o meaalofa ae le umi ae tatau lava ona i ai se saying a tatou i le tulaga foi o le faatinoina o lea matafaioi.

Ia, ae i le vaega o le LTA, aua ou te talitonu o lea ua me'i uma tulaga foi o le pasiaina o taavale i le vaega o le LTA, a tulaga foi ia o le faatinoga o solitulafono ia po o instant fine lea sa faatinoina a o i ai leoleo foi i ituauuala a le LTA, po ua i ai toe i ai la ni instant fine po ua faatino e le Matagaluega o Leoleo, a o le manaia ia o si vaega sia, ona o le tulaga foi e vave ona maua ai le tamaoiga o si o tatou atunuu, i tulaga ma leai ni pepa tele e alu i court cases ma tulaga faapena.

O le faafesili atu lena i lau Afioga, ae momoli atu lava le agaga faafetai i galuega fai o lena tausaga aemaise ua tatou molimauina ua le misi lava se vaiaso ma tulaga foi o tatou meli, le pulega o uafu ma taulaga, ae faapena foi le vaega a le kamupani vaa, i latou sa faatinoina le galuega i le vaitaimi o le pisi. Ia, o le vaega foi o vaa, o lea ua vaavaai foi ananafi ua maua mai le isi avanoa e 60 mo tatou alo ma fanau o lo o faapena ona galulue i aliivaa ma tamaitai. Malo i le pulega aemaise o lau Afioga i le alii Pule, faapena foi i le tautua a le EPC ma le Vai i vaitau foi o aso fiafia.

Ia, ae faamuliai atu i se talosaga i lau Afioga i le Minisita, ou te talitonu e pei lava o oe e i ai vaega ia, i si o matou itumalo i le matou nuu o Niusuatia, e pei lava ua uma ona asia tulaga foi, e le o ni auala galue, a o auala o lo o nonofo ai tagata. Manatu, o le ala lea o le talosaga atu, o lea lava ua manino taijala foi o le faiga o auala galue, e pei o lea ua lafo mai i le tatou miliona, ao auala ou te talanoa atu ai, o auala o lo o nonofo ai tagata i Niusuatia, e faapena foi i Vaiee. E talosagaina lau Afioga, o le auala lea e alu agai le faleaoga mo nai alo ma fanau, ua matua faletonu lava le auala i le agai i le aoga a Vaiee.

Ae faapena foi i si o matou nuu i Fusi, toeitiiti lava au le auala, a ua toe faavaivai lava. O le tatalo atu i lau Afioga, ia faapena ona silasila i ai le tatou Matagaluega i tulaga foi o auala o lo o nofoia e nai o matou tagata.

E faapena foi le nuu o Tafitoala, o le auala o lo o agai i uta i le mea o lo o i ai le faatanoavai, ua nofoia uma e tagata, o le leaga ia o lea auala, ou te talitonu e molimauina foi e le vaega a le Suavai o lo o fai ai a latou galuega, o le tatalo lava i lau Afioga ia faapena ona silasila i ai, ina ia saogalemu foi i latou o lo o nonofo i lea vaega o le atunuu. E faapena foi i le nuu o Mulivai, o le latou auala foi i mea o lo alaala ma papaaa ai i latou.

O le matou nuu o Fausaga, o lo o lelei le auala agai i uta, ae o le tatalo i le Minisita o le Siosiomaga, se i e silasila i se taligalu a lenei nuu, ua afaina tele i le vave mai o le sami, afaina ai ia vaega o lo o nofoia.

Ona oo mai lea o se faamatalaga i le vaega o i ai le tatou puleaina o oloa o le tatou atunuu. E matauina i lenei taimi le tele o mea ua sioki mai lava i le tulaga o meaai, aua o lea faatoa maua mai aniani i le masina lea na tea. O tulaga foi o... e le tau po malae, o pia o mea uma lava ua tele ina sioki. O le vaavaai a lenei sui usufono, afai lava o le tulaga lea e fai ma sioki, ia e lelei i le isi itu e tau tipi ai le ai, ae o le tulaga mo aso uma, e faapena ona tatalo atu, o le a lava le silasila a le Matagaluega, po o i latou foi o lo o nafa ma lea vaega. O le tatalo a lenei itumalo, ia faapena ona silasila mamao i taimi e oka ai a tatou oloa a o le taimi e faaogaina ai mo si o tatou atunuu. O nai manatu na mo lenei itula o le aso, ae momoli lava le agaga faafetai...

**FOFOGA FETALAI:** Ia malie lava le sui usufono se i tulai mai le Minisita o Faatoaga ma Faiga Faiva.

**Susuga Hon Laauli Leuatea Polataivao Fosi (Minisita mo Faatoaga ma Faiga Faiva):** E faafetai mo le avanoa, e faatalofa atu foi i le paia o le Palemene, aemaise lau afioga i le Fofoga Fetalai, malo le onosai. E faatalofa atu foi i le faafofogaaga a le atunuu.

Sa tuu lava se i saausi le saunoaga a le sui usufono mamalu, ae o le tulaga lea na ia taua i le manu ainiu. Ou te taofi lau afioga, e le o se faafitauli fou, ma o lo o taumafai pea le tatou Matagaluega e tau foia le mataupu lenei. A o le atoaga o le foia o le mataupu lenei lau afioga i le Fofoga Fetalai, o le faatagisia pea lea o le fesoasoani a le pule mamalu a alii ma faipule ma afioaga uma. E le taitai mafai e le Matagaluega e toatasi, ona foia le mataupu lenei, o le mataupu o le national issue. O lea lava tatou te finai, e lele atu nei le manuainiu nei, alu i Aleipata alu i Savaii taamilomilo mai, e faapena le faafitauli lea tatou te i ai. O lo o taumafai le Matagaluega e fai atu aoaoga ma mailei ma mea uma o lo o avatu. Ua ova atu i le afe iliafi ua tufa atu i le atunuu e foia ai le mea lenei e taumafai e fesoasoani atu alii ma faipule, ma faifaatoaga tatou te fesoasoani faatasi.



E avea foi lenei avanoa e talosaga i le tulaga lautele, i le faafofoga mai o le aufaifaatoaga niu uma o Samoa, faamolemole o le tatou galuega fai faatasi. O le tulaga lea ua e taua i le tau o le niu, e sao oe, o lo o taumafai nei le Matagaluega e toe fai le gene bank fou a le tatou Malo. E 200 eka sa i o i Oloamanu sa i ai le gene bank tele lea, sa faatulaga mai i le fia o tausaga, le nofoaga lea sa faafailele uma ai niu i Samoa. Lau Afioga, o le niu Samoa sao lea e maua ai le tatou peepee, o le tatou samoa tall, o le niu faafeusuai lea ua saunoa i ai le sui, e na o le inu lava. Ae le mafafia se aano mo le peepee. O le taou niu vai, niu tea, niu laaita, niu afa ma tatou niu fua maualalo. Ua faasolo na leai uma mea na, ona ua taofi le tatou luaselau 200 eka lea sa i Mulifanua. O lea la ua toe talosaga le tatou Matagaluega i le tausaga lenei e toe faatu se isi gene bank. E na o le lua lava atunuu o le Pasefika e i ai gine bank, e na o Papua Niu Kini ma tatou. Ae o le faalavelave ua tatou nonofo ma taofi ae fau ai le falepuipui i luga. O lea ua toe taumafai atu nei le tatou Faigamalo filifilia ma le tatou Matagaluega i le tausaga lenei, e talosaga i le SPC ma le FAO, e faatu se nofoaga e toe faafailele uma ai a tatou niu nei. Aua o lea na fai foi e le Faigamalo lea na uma nei, le ban e sa a tatou niu inu, ona toe ave i fafo. Ae pau lea o le auala e maua ai tupe a le aufaifaatoaga o le niu inu lea aua e sefulu tala Niu Sila, sefulu tala Ausetalia i le niu e tasi. Ae o lea ua tatou vaai i le sulu mai o le aufaifaatoaga ua sii le tau o le niu, e lima tala i le sefulu tala. Ia malilie lo tatou atunuu, o lea faatoa inu le aufaifaatoaga niu. Ave le avanoa e faatau ai niu lelei malulu mo le paia ma le mamalu o lo tatou atunuu. Ia tatou logosaia, se i sii foi le tau o le niu inu ia. Ma le agaga lena ua momoli atu, toe fai le tatou faafailelega niu lenei, lau afioga i le Fofoga Fetalai, ua tatou nonofo ma tiai uma le mea e atiae ai le niu. O lea la ua toe faatulaga atu, o la ua tapena nei i Nuu, leaga ua o atu nei le Falepuipui ua o atu tatipi uma i lalo niu sa faafailele i le fia sefulu tausaga. O le agaga lena e faamalamalama atu i le sui mamalu, ia lava mai le onosai. A o le tatou manu ainiu, ia e alofa, logo uma taulelea o le tatou nuu, tatou galulue faatasi i le foia o le toe felelei solo o le manu ainiu. Ma le faaaloalo.

**FOFOGA FETALAI:** Malo faafetai. O lea ua faafofoga mai le sui mamalu, faafetai foi lagalaga o lea faamalamalama le Minisita i ia tulaga ia na e laga. Faauma mai le saunoaga le sui mamalu.

**Afioga LAUMATIAMANU RINGO M. PURCELL:** Faafetai lava i le Minisita mo le faamalamalamaina o le tulaga o lo o i ai le manu ainiu ma fuafuaga foi i banks ia e pei ona ia taua, o le a toe tulai, ae manaia le fai o Upolu ma fai foi Savaii, i le tulaga o atinae ina ia tutusa Savaii ma Upolu, o le tatalo atu lena.

Ona muliai mai lea o se faamatalaga i le Minisita o Aoga, ou te le o vaai atu i le Minisita o Aoga, ae ou te iloa o lea e i le Minisita lagolago, i le

tulaga foi lea i le Ao o Samoa, lea sa talanoaina ai le exchange o polokalame faaauau a aoga, pe na faaauau lena vaega po o le a se tala i ai, aua sa ta fia faalogo lava i le tulaga e tataua ona oo i ai le...

**FOFOGA FETALAI:** Se i ou fesoasoani atu lava i le sui usufono mamalu, le Ao o Samoa po le Atoa o Samoa?

**Afioga LAUMATIAMANU RINGO M. PURCELL:** O le Atoa o Samoa, faamalulu atu, i tulaga ia. E pei o le talanoa atu lea i lenei itula o le aso.

Ae momoli atu le agaga faafetai i lau afioga, e tusa ai foi ma le avanoa ua tuuina mai. Ia tatou tatalo faatasi, ia manuia le siigagasegase a le Tamaitai Palemia, Minisita foi, aemaise o nisi o sui usufono o le Palemene. Ia agalelei le Atua i lenei aso. Faafetai.

**FOFOGA FETALAI:** Malo faafetai, faafetai mo le faasoaa a le sui usufono mamalu, o lea ua faafogafoga foi ma le totoa le Malo, atonu o se taimi faaauau le saunoaga a le Malo, ma tali foi i nisi o mataupu sa laga e le sui mamalu. Ae faafetai o lea ua vaai atu i le Tama Matua ia Sala.

Ia se i tulai maia lau afioga i le sui usufono mamalu mo Sagaga 3.

**Afioga Hon SALA FATA PINATI (Sagaga 3):** E momoli atu le faafetai mo le avanoa.

Ou te faatalofa atu i lau afioga faapea le paia o le Aiga Kapeneta, Sui Minisita o le Kapeneta, Sui Palemia lou uso, malo Tuala. O oe lava o au lea Tuala, matau Samoa, e ui lava ina eseese mea ta te... ae tasi lava lo ta fala tasi lo ta aluga, faafetai.

Ou te faafeiloai atu i le Sui Taitai o le matou Vaega po o le Taitai foi o le matou vaega e pei ona taua e Tea. O lea foi e pei ona taua i le vaiaso na tea nei, o le Taitai lea o matou mo le taimi nei, o Fonotoe.

Liliu mai ia Alaiasa, ia o le Sui Taitai lena o matou, ae lona tolu ia te au le isi Taitai, e faafetai atu ai. Ma e momoli atu foi le agaga faafetai i le sui o le three Amigos. Ou te faamalulu atu, ua ala ona ou taua sui o Amigos, ona o uo mamae a au nei. O Tuuu, Hon Ale, e te le i oo la i ai i le Hon ma Mauu, oi se talofa, o le mea e tataua ona fai ia Mauu...

**FOFOGA FETALAI:** Ia malie le sui usufono mamalu leaga o lea ua taua le suafa o le Igoamatua. Tulai mai le sui usufono mamalu.

**Tofa Ale Vena Ale (Faleata 4):** Faafetai tele i lau afioga i le Fofoga Fetalai mo le avanoa. O le saunoaga matagofie a lau afioga Sala faafetai tele lava. Malo! Faafetai ua vaavaai atu sulu o le tino i lenei taeao ua e taliu mai ma le manuia lau siigafifo. Alofagia e le Atua lou soifua.

E pau lava le mea lea ua ou tulai atu ai, e le o matou ni three Amigos, faasao le mataupu lea, ua toatele outou pe tou te faifai mai ia matou nei e toatolu, ae sei tatou mataitu pea le matou mataupu. O le aiatatau a le tagata lea ua alu ese ai mai i ina, o lea ua matou taumafai e tutoatasi. Ia manuia tele le Fono i lenei taeao.

**FOFOGA FETALAI:** Saunoa le sui usufono mamalu.

**Afioga Hon SALA FATA PINATI:** Faafetai, ina nei tetena i le tofa foi i le faafofoga foi a le sui Amigos, se o le three Amigos e i ai le ata foi lele, three Amigos e leai se uiga. E pau lava le agaga e avatu ai, se o uo a tatou o uo i aso uma. Fai mai le Toa Samoa, e uso lava i aso uma, o ai le toa? O tatou i le Maota, o tatou lea na filifili mai e le atunuu, toa, toa, toa. O outou o le toa, avane ai ma se faaopoopoga i lenei taeao, o le toa e sili ona taua i le taeao lenei, o lau afioga i le Fofoga Fetalai, e faafetai. E matau pea ma le totoa, e le faigofie le galuega o lo o feagai ma lau afioga. E fai foi o le vaogata o le vaega lea, e fiu e fai atu e nonofo ia i lalo ae fai mai, se i fai lava se mea e faatiga ai le Fofoga Fetalai. Ae faafetai o le soifuaga lea o tatou...

**FOFOGA FETALAI:** O lea faatoa tulai mai si Tama Matua ae....

**Afioga Sulamanaia Fetaiai Tauiliili Tuivasa (Vaimauga 1):** E ava tele i le sui usufono matua lea o lenei Itu, ae pei o lafoga o lenei taeao ua pei ua tau ai fua sui o Amigo ae pei e sili atu le tala lena. O sui o Amigo o le tulaga lea i friends, a o le saunoaga sa saunoa i ai le Minisita la e tuu mai i o i le vaega lea, e pei e sili atu ai sui o Amigo i le gagana lea o le pea tolu, e sili ona matautia lena saunoaga, ona o le pea e tataua ona lua, ae o fea o taupe ai le isi tasi... ae o le sui Amigo o se mafutaga aua o mea nei i Mexico o friend e o e talai, o milionea, e o e tufa, faafiafia i faafiafiaga, e pei e tufa le tamaoaiga. Ae o le saunoaga a le Minisita lea sa faatusa ai i le pea tolu, e le matagofie lau afioga i le Fofoga Fetalai. E pei o le agaga lea, o le a faifai i le sui Amigo, ae o le saunoaga a le Minisita e matautia i le Palemene lenei.

**FOFOGA FETALAI:** E faamalulu atu foi i le sui usufono mamalu, o upu lava e faapena lava suaga a le Maota, o tatou lava o taitai o le Maota e faapena lava ona feliuliui, ia maua pea le toamalie ma le filemu.

Tulai mai lau Afioga i le Minisita o Galuega Tetele.

**Tofa Hon Olo Fiti Afoa Vaai:** Faafetai i lau afioga, aua e pei e foliga o au lea sa faia le tala lea i le pea tolu. Ae ese la le uiga sa ou faauigaina ai ia le tulaga o le pea. O le pea o se fruit suamalie tele. Sa ou faatusa ai la le

toatolu lea, o ni tagata matua suamalie lava, e mafai foi ona ou faapea atu, o le apu tolu, e pei o le uiga lena o lau faamatalaga. Ae ou te le iloa la po o le a se isi faauigaina e le sui usufono mamalu. E faamalulu atu ai i lau afioga ma le mamalu o le Maota.

**FOFOGA FETALAI:** Malo faafetai, o le measili la lea ua manino lea vaega, e le o le pea foi lele a o mea o apu... Se i tulai mai Tuuu.

**Tofa Hon Tuuu Anasii Leota (Siumu):** E faatalofa atu i lau afioga ma le paia o le Maota, e faatulou atu foi. Lau afioga o le taimi sa o matou lauga ai, e taofiofi i matou aua nei o matou oo i vaega ia, nei lava la e fai mai, a o lea ua lagalaga mai, o lona uiga ua maua foi le avanoa e toe lauga foi, e tau uma atu ai mea uma ia sa fia avatu, ae o lea lava e taumafai mai. Lau afioga, o lea lava matou te taofiofi ma faamamalu le tatou Fono, a o lea lava e lau mai o le Amigo o le pea lua, o le a ea le pea lea? Ma le faaaloalo, Manuia le Fono.

**FOFOGA FETALAI:** Ia malie ia le sui usufono mamalu, tatou talasua foi i le Maota, ae nei tei ua mamao atu i tua le silasila ma le faafofoga mai o le atunuu. O le mea lea o lea e faafofoga mai le Failautusi, aveese ia faamaumauga o Amigo ma faamaumauga o le Maota. E fesoasoani foi i le tama matua, ia maua foi le agaga o lenei mataupu e faapena ona tatou faasoa foi ma le agaga faaaloalo. Tulai mai le sui usufono mamalu.

**Afioga Hon SALA FATA PINATI:** O uiga lava ia o le soifuaga e faapea, e taaalo lava tama a o le uso. Lau afioga leai e faapito se faamatalaga i lenei taeao. E momoli atu le faafetai tele, sa outou molitaulaga foi aua le faatafagasegase o le Tamaitai Palemia ma le aiga Minisita, ma afea atu ai foi ma lou nei tagata. O lea ou te talitonu o lea ua i luma o le Atua ia taulaga e pei ona folasia i le Maota i lea vaiaso ua tuanai, o le agaga lea e fia faafetai ai lau afioga. E le faagaloina foi galuega lelei, aua o mea uma ta te faia, o lo o silasila le Atua ma faafofoga, aua e pei ona saunoa, o Samoa lava ia mo Samoa. o le atunuu lenei o tatou, o le fuata foi ma lona lou. Ua ou taua la lea vaega, ona e talu ai, sa o matou nonofo mai foi i ina, o lea ua fesui ai ia ia vaega, o le lagolago ia e avatu le lagolago, e leai se agaga e teena ai, e teena aisea? Sei vagana ua ou nofo mai Peretania i fafo ona fai mai lea o le agaga lea, pe faapea ua ou faatautee i se mea. A o lou nei sui usufono e momoli atu le agaga o le faafetai.

E faafetai i le Tala o le Tupe lau afioga i le Tamaitai Minisita, manaia, e ese lou lalelei, ou te nofo pea ma ou matau la tatou mafutaga i le taimi ua tuanai. Ia faafetai i le Atua aua o le Atua e pulepule tetele, o mea ua tatou maua, o le Atua e ana, o mea ua faia i lea aso i lea aso, faafetai i le Atua o lo o malu pea i tatou i lana puipuiga ma lana tausiga.

Oo mai sau faamatalaga i tulaga e pei ona taua e le Minisita o Galuega, ua savali nei le 17 sefulufitu tausaga, toe tolu nei tausaga ona atoa lea o le luasefulu tausaga i le Maota lenei. O le 2006 na tatou omai faatasi ai le Minisita o Galuega, le Minisita o Faatoaga ma isi foi o tatou o lenei Maota i le matou Itu. O ai na manatu e oo i lea vaega, ae o le faatauvaa o le tagata, a o le Atua e mafua ai nei mea uma, aua e le tupu fua se mea, e tupu lava mea uma o lou galue, e galue mo ai? E galue mo le atunuu, e galue mo ou tagata ma lou itumalo. E le soona filifilia foi tatou, e le o se mea tatou te omai e nofonofu ai ma faapea ua ou sau i totonu, o lea ua ou nofoia le Nofoa, o au lava lea. Pe taua e se tasi o alii o le matou nuu ua faapea ona amia e le Atua, o le ia lenei o a'u e lololo tele. Aua foi o mea uma lava o a'u, o a'u, o a'u, ae le o le na le tulaga e pei ona ou taua. Ou te momoli atu ai le agaga faafetai i le aiga Kapeneta ma Minisita Lagolago i la outou matafaioi, e le na ma le laina, le tele tele o luitau, ae e te manatu ifo lava, e le faia mo oe, e le faia mo lou aiga, e te manatu, o a mai le atunuu? O fea o i ai le tamaoai o le atunuu, o fea o i ai le faigata o lo o i ai nei?

E na o se leo, o le leo o le tuualalo ua matuai taugata, taugata ua faigata le soifuaga o lo o faapea ona soifua ai le atunuu lenei. E le aoaia foi e le matapia le manaia e sa foi i lou nei tagata ona ou faatinoia pe fuafua e fai atu se faamatalaga ina nei le tusa ai ma lo outou finagalo, ona avea lea ma lape ia te au. Ae pau lava lea o le fautua atu, fautua le tagata matua mo le lumanai, i le le toatele o le atunuu e le tagolima. E tuufaafegai e le Atua mea uma checks and balance ua faataatia e le Atua mo i tatou. Ou te taua le vaega lea, ona e fai o le faigata ma le taugata o le soifuaga lea ua i ai nei, pei o le tau o le moa lea ua \$100 foi le tau, o le pusa lea ua i ai, o le tele o oloa ua le maua. Ae ou te taua le checks and balance lea e i ai alo ma fanau o lo o ave i fafo e toatele. Ua faapena ona aumai ai le tupe o lo o manaomia e aiga e tausai ai, o pili o aoga o tamaiti o le taugata ia, e taugata le potu. O le potu e tataua ona tuu atoa i ai lou taumafai o oe le tina, le tama. O tupe ia mai fafo, o tupe ia o lo o faapea ona maua ai le soifua manuia o le tatou atunuu, i o tatou tagata i tua. Ou te le taua le aufaipisinisi ma i latou aua e le faigofie foi le latou matafaioi, e leai se mea e maua fua. E te maua ifo lava mea, e pei ona fai mai le Tusi Paia, o le afu o lou muaulu, e te maua uma lava mea ma le tiga, e faigata.

Ae momoli atu ai le agaga faafetai i le aiga Minisita, o le aotelega o lau tautalaga, o outou mama na, aua po o fea lava e agi i ai le matagi tafe i ai le au, e tasi lava le mea e pau i ai. E aafia lava le atunuu lenei, i tatou lava, po o le a foi se faitioga e avatu iinei, ia lava onosai, ia lava le faapalepale. O tulaga ia i le tatou soifuaga, i lau mau toatasi, a tele le faitio mai, ua ou iloa o la e lelei mea, aua foi e te nofo ala, e te moe manatunatu i aso uma, e le moemoenoa, o itu ia e avatu ai se fautuaga i lenei taeao. I le aiga Minisita, Minista Lagolago, o outou mama na, ia faapena ona foai atu e le Atua le malosi ma le Mana e faatino ai outou tiute atoaatoa.

Ona oo mai lea o se faamatalaga i lou itumalo, o Aleisa ua 60 tausaga o le matua o le atunuu lenei, ae o le faafitauli matuia ma ogaoga o lo o tupu mai Aleisa, o le leai o se vai. A maua le soifua maloloina o tatou i mea uma lava, a aunoa loa ma le suavai, o le fesili la lea. E faafefea ona soifua mai i latou e aunoa ma le suavai? O le mea moni lava ia, o lo o i ai le suavai i lalo o le aualatele, a o le pogai e le oo i luga o le aega, o lo o faapena ona nofoia e le toatele o le atunuu i Aleisa. E na o le tuu atu lava o le fautuaga i le Minisita o lo o feagai ma ia vaega, ia e alofagia lau tatalo atu. Ou te tatalo atu ia te oe, a e vaai ma e silasila i lau fanau ma lou aiga, e faapena foi ona tatou mataitu, pe faapefea ona soifua mai latou, i Aleisa e aunoa ma le faamanuiaga lea. Ae ou te talitonu o le Minisita o Galuega, ua lava lou soifua i totonu o le Maota lenei, e te le tau tulai mai e te tali mai, o lea ou te iloa e te faia mea uma, e ia te oe le manatu foi lele e pei ona aumai ai le manulauti, a lelei mo Upolu, e lelei mo Savaii.

Lau Afioga i le Minisita o Faatoaga, ou te faafetai ai, e faafetai e leai se mea, ua e tausili i mea silisili ona lou manatu i le atunuu lenei...

**FOFOGA FETALAI:** Ia malie lau afioga i le sui mamalu ae e te lei see ese i le tulaga lea, ona e taua tele le tulaga lea e i ai le afioga o Aleisa.

**Tofa Olo Fiti Afoa Vaai:** E faafetai i le sui matua o le Maota. E sao lelei le saunoaga e pei o le matou vaega lea i le 2006, malo lava le folau, ua fai foi si tau umiutu atu o si tatou amio. Ae o le vai lea lau afioga i le Fofoga Fetalai, ua maligi lava ou loimata i lou alofa atu Sala, i le tulaga o lo o i ai Aleisa. Ae faatoa ou faalogo lava lea i ai, faatoa ou faalogo lea ua i ai se talosaga i le mamalu lea o le tatou atunuu o lo o papaaao i Aleisa i le sefulufitu tausaga talu ona tatou omai i inei. Ae faafetai o lea ua laga, sa faapea e fai lea atinae ma lenei fesoasoani i Aleisa i le sefululima tausaga talu ai. Ae o lea faatoa 15 masina lea faatoa...ae tuu mai lou faatuatuaga, o lea o le a matou galulue ai, e le i lava tele se taimi e silasila i le itu lea, ae aua e te popole lou uso. faafetai.

**FOFOGA FETALAI:** Malo faafetai, ua tali manino le Minisita aua foi le faamoemoe. Mo le faasaoina o lou taimi, se i tulai mai le Minisita o le Soifua Maloloina.

**Afioga Hon Valasi Luapitofanua Toogamaga Tafito Selesele:** E ese le taua o le saunoaga a le sui mamalu, ona o au le isi tagata o lo o alala i Aleisa, e matua ou faamaonia lelei. Ae o se mea e fia faamanino i le Minisita, sa i ai le tuuga o le Malo talu ai, e sau le ogapaipa mai uta. Ua leva ona fai aoga a le nuu, ua leva ona faalauiloa i Aleisa. Ma e aua foi nei galo, e talu lava ona tulai mai sui, sa fai ma sui o Aleisa, o le Malo lava o le HRPP, sa polomisi uma nei mea, e leaga o la ou te nofo ai ma fai ai lau

faatoaga, e sao lelei... ae tatalo atu faaopopo i le tatalo a le sui usufono, e manaomia le suavai. E na o le alatele lava lea e i ai le paipa, a omai tagata mai uta e ki vai i tagata ia e i tai i le main road. A o le toatele o le nuu e i uta, talofa. O lea la ou te iloa ua ootia le lagona o le Minisita ona o tulaga i le mea o iai ma le vaai. E le gata i lea o auala o lo o i totonu o le nuu, e taua le lagalaga ma fesoasoani atu, aua o lea e nofo ai ma... e ui lava ina ese lou itumalo ae ese lou fesoasoani ia Aleisa, o le tele o mea e sulu atu, ma ou fautuaina. Ou te le tutulia la ia Sala ae fai i ai le fesoasoani. E taua tele, malo Sala, a fai e fai uma mea ia, e te le toe pau lava, e fiu le sui e lue oe, ou te fesoasoani i au campaign i uta pe a...

**FOFOGA FETALAI:** Malo atonu o lea ua faamalieina le sui mamalu, o lea foi ua tali malamalama le Minisita, o lea foi ua faaopopo le Minisita o le Soifua Maloloina.

**Afioga Hon SALA FATA PINATI:** O le agaga lava ia o le faafetai, o le a se isi mea o le ifo atu ma faapea, e to atu lou pulou. E leai sou pulou ae faafetai. Talu ai nei a o matou nofoia le nofoa i ina sa faapena ona ma o ai ma le Minisita o Galuega ia Niko Lee Hang. Talofa e. Ma sa fai le galuega e fia faaauau le paipa lea na avatu, e i ai le vaega o Aleisa o lo o faapena ona i ai le paipa... a faafofoga i ai ua le oo ma taunuu ia fuafuaga. Ia pei a o le mea foi lele ua te i a ua ta pau i lalo ae le iloa pe faafefea ona pau ia sei avane a le gutu ma le afi, aua foi le o i ai se mea faapea e te i a ua pau. Ia a ua tu atu tu i le ea. Ua laki a le tu o ota vae i le elele ae ou le afaina.

Ou te faafetai ai i le Minisita o Falemai. E moni o le tulaga la o lo o i ai uta ae sa fai a le galuega ma le manatu e tino i le matou taimi, ae pei a ona ou fai atu o le Atua e pule le Atua ia te i tatou. E fai a tatou fuafuaga ia o mea na e le tusa ma le finagalo o le Atua. Ia o lea o le a tuu atu ia te oe le Minisita o Galuega.

Ae o le a ou oo mai i le Minisita o Faatoaga. Le Minisita o Faatoaga, o oe a o le toa, ou te le selu atu ia oe e leai se mea la ou nofo ai fua viivii atu fua oe. Ae ou te avatu upu moni ma o se agaga foi o le faafetai ou te talitonu i mea e te saunoa ai e tupu, aua o oe o le tagata faifaatoaga. E moni a au i le manu aini. Ua ou fiu e faiatu i tama na o Patea ae ou te le iloa pe faapefea ona fai ae o le talosaga e tataua ona avatu i totonu o le Maota leni ia galulue uma itumalo, aumai lo tatou lagolago fusia faatasi ona taunuu lea i le taunuuga i se mea e maopopo ma lelei aua le atunuu leni. Ae afai foi ua taugata le niu ia e moni ai. A le taugata le niu ua tau faapaleni atu e faifaatoaga ia nai o tatou aiga e matitiva ua le ogatasi le futia ma le umele. O ia vaega uma e naunau ai i le tupe a le ave le niu i le tau lea \$10 po o le \$8, \$5 e le maua le vaegatupe e fuafua i ai le tamaoaiga aua le fanau, aiga ma Ekalesia. Ona avatu ai lea o se tuualalo ia silasila ifo pe faapefea ona tatou taofiofi le tamaoaiga ua alu i luga i faleoloa. O nei e te alu atu e fai le

faatau faapea mai lea e \$60 le tau o le pusamoa ae e te toe alu atu taeao ae fai mai ua \$67 o isi fale ua \$70. O le taimi nei ou te molimau atu ua oo i le \$100 a o le masina na tea nei sa i lalo ile \$50 i le \$60 a o lenei ua \$100 le tau o le pusa moa. O a mea ua faagaogaoina i totonu o pisinisi faleoloa ma mea na, ia e i ai le mea foi lele e tau o le price control ae fai mai foi le mau a isi, e tatau ona tuusaunoa e faitalia le pisinisi ia i lana tau mea foi ia o le competition foi lele. Ia le taimi la lena e lelei pe a tele le oloa ae afai e laitiiti le oloa ae alu la i le competitive price o fea o i ai le sao? E tatau ona i ai se ceiling e agai i ai i latou e fai ma benchmark na te target ina, a o le mea lea e i ai, ua pule a le tagata ia i lana tau fai mai ai le tamaloa Levi. E fesili atu i ai, a alii e fia le tau o au pusi? O le toeaina lea ua o atu tagata e faatau ana pusi ae faapea mai le toeaina, e pule a Fetelika ia i le tau o ana ia pusi. E pule a oe le faifaatoaga i le tau o au mea.

O le tulaga lea e i ai le tatou atunuu e afaina foi i inei, aua e le mala ese i ina mala ese i inei. Ioe. Ia maualuga i le Maota lenei le tatou manatu ile atunuu aua, aua, o la'u tuualalo aua nei o tatou faataua tupe aua. O le tupe lea na nofo ai Iuta ma faalata le faaola a o le tupe foi lea, e soifua manuia le atunuu lenei pe a tatou amo faatasi le avega, tatou galulue e aumai i lalo le soifuaga. O a itu ia? O i ina ma i inei, e fusia tatou i le alofa e faatino ai lo tatou faamoemoe. Lau Afioga i le Fofoga Fetalai ou te faamalulu atu afai foi ua le tautamalii se faaupuga... ia

**FOFOGA FETALAI:** Malie le sui mamalu se i tuu atu le avanoa i le afioga i le Minisita o Faatoaga ma Faiga Faiva.

**Susuga Hon Laauli Leuatea Polataivai Fosi:** Lau Afioga i le Fofoga Fetalai, sa manatu lava se i afu le saunoaga a le sui usufono. Sala aua nei o tatou maua le agaga o le faaviivii ae tatou faafetai i le Atua ona o le tatou soifua auauna aua le atunuu. O le tali atu a le tatou Malo i le pagatia lea ua tatou i ai i le tau o le soifuaga o lea ua i o tatou lima. O lea ua e saunoa lelei ile alu i luga o le tau o le soifuaga e le o se mea tatou te puleaina. O le mea e tupu i fafo i Malo tetele, aafia tatou. A o le tali a le tatou Malo i le atugaluga lea te aumai i i , ia lafo mai laia i le tatou faigamalo e pei ona saunoa atu le afioga i le Minisita o lea faatoa 16 masina, 17 masina lea tau faatavili atu nei.

O le tali i le mea lea o le siitia o le tau o le soifuaga faatoa uma nei i le Aso Toonai le uluai seleselega a Lufilufi na matuai omai uma ai le itumalo atoa e aumai meaai aano, aumai lafumanu. O le tali lena lau afioga i le sui usufono, o lea ia tatou le tali e tatou te le toe ola faalagolago ai i oloa ia aumai mai fafo, fafaga a tatou moa, fafaga a tatou puua, fafaga a tatou povi, fafaga a tatou mamoe ma mea tatou te tua i ai, toto ia lava meaai aano. O le auga lena o le faamoemoe o le Malo i le uluai seleselega aua foi e leai se isi e omai e fafaga tatou, tulou le faafogafoga mai o le atunuu, tatou lava ia.



O le suiga lena lea ua sui ai le fuafuaga o le tatou faigamalo ae le o tauvaga tetele foi ia sa fai i Apia ma Salelologa. O lea ua faasolo i le atunuu atoa ina ia a? Ina ia unaia le pule mamalu a alii ma faipule aemaise le atunuu atoa, a e manao e secure lou food security fafaga ni au moa se 360 taumafa lau moa i aso uma, fafaga ni au povi se 12 taumafa lau povi i masina uma, fafaga ni au puua se 52 taumafa lau puua i vaiaso uma. Ia se i silasila la lau afioga i le sui usufono, o le ata faataitai lena o lea momoli e atu. O lea e i o tatou lima le fofo. O ai la e sau e fai e pei ona e saunoa Sala? O ai e omai e fai? E faifaatasi e tatou. Ae lafo maia lou faatuatuaga o lea ou te faatali i lau uluai seleselega e o atu ai foi le Matagaluega e momoli uma atu mea e te finagalo ai, ia ma le tinoitupe e fesoasoani mo le aufaifaatoaga. Ua ou manatu e avatu ne i te i ua faapea mai le atunuu e leai se mea e tasi a le Malo o faia e fesoasoani i le mea lea ua tatou feagai ai nei, lea e faasolo atu le tatou polokalame ma le faanaunautaiga tatou te tutufaatasi lau afioga i le sui usufono, lou itumalo ma le Malo ia ona manuia lea o le tau o le soifuaga lea tatou te taumafai e faapau. Ia o le faamalamalama lea e fesoasoani atu ma le faaloalo.

**FOFOGA FETALAI:** Faafetai mo le fesoasoani atonu o lea foi ua tele a ina faamanino mea uma sa laga e le sui usufono mamalu.

Ia, faamaea maia le saunoaga lau Afioga i le sui usufono mamalu.

**Afioga Hon SALA FATA PINATI:** Lau afioga i le Fofoga Fetalai, se ua matua ese le lagona ina ua saunoa mai si alii Minisita o Faatoaga, e lava ma totoe lo'u iloa ia Laauli. E pei ona ou taua 2006 na omai ai o lea a e oo mai i le aso o lea ma te faatasi... la ma auaunaga o lo o fai ae faafetai foi i le Atua aua ana le seanoa ma le alofa o le Atua e le oo i ai Laauli e le oo foi i ai a'u. Lau afioga ile Fofoga Fetalai, faafetai tele mo le avanoa ia manuia Samoa .

**FOFOGA FETALAI:** Ia malo saunoa lau afioga i le Tama Matua, le sui usufono mamalu mai Sagaga Nu 3. Ia, atonu ua tele foi lou sao ile faafogafoga mai a le tatou Malo aua lava le tapuaaoina o le soifua o le atunuu i lenei foi vaitaimi ae malo faafetai mo le faasoa.

Ia o se taimi nei lea lava e maua le avanoa mo se tasi o sui usufono mamalu. Ia, se i tulai mai lau afioga i le sui usufono mamalu o Lefaga ma Faleaseela, lau afioga i le Minisita Lagolago.

**Afioga MASINALUPE MAKESI MASINALUPE (Lefaga ma Faleaseela):** Faafetai mo le avanoa ua maua e lenei sui usufono. Lau afioga i le Fofoga Fetalai ae le i faia se tala aua paia ma sa o le atunuu aemaise foi o lenei Maota, e fia momoli a la'u faamaisega aua le tuua o le malo e le Susuga i le Faafeagaiga ia Falevi Petana sa galulue i Maota. O le

faafeagaiga taulagi a le afio o le Taufaaasisina ma Alalamatuatala, maliu lau fetalai le Maota lau Tofa Leulu maliu mai oe Toiloto. E mafai foi ona ou faapea atu o le lupe faalele a le afio o Tofaeono ma Tama, maliu mai ouluna na ta'i ma le nofo a ituaiga ia Fuata, afio le Aiga o Mavaega, alaalatai fuaitolu ma fuaifale e pei ona i ai foi le lupe faalele a Faleasiu. Ia atonu foi o se lupe faalele foi aua le afio o le Aiga Sa Tuala, afio le Uso ma le Ailaoa, alaalatai le Faletuisavailuu ma le nofo a ituaiga. E faamaise atu i le Faletua ia Pelenatete ma le nofo a alo aua le amiga paia a le Atua, amuia olua o valaau le Atua i le faafeagaiga o lo o faapea ona fai.

I lenei itula e momoli atu le faafetai tele lau afioga i le Fofoga o le Fono mo le avanoa, aemaise o le paia maualuga o le Maota i le afio i lau afioga i le Sui Palemia, lau afioga i le Sa'oalii faapea le Aiga Kapeneta ia ma Tamaitai Minisita, faapea foi le mamalu o nofo a Sui Minisita.

E le vaea foi le falaooto i le afio o lau afioga i le Taitai faapea foi lau afioga i le Sui Taitai, faapea foi le paia maualuga o lena itu i sui usufono filifilia.

E le faagaloina foi le tapuaiga a le afioga i Le Ao Mamalu o le Malo ma lau Masiofo. E faatalofa atu foi i le Sui o le Fono a Sui Tofia ma lou faletua, le mamalu o le Faamasinoga, aemaise le maualuga o le Ofisa Faamasinoga. E faatalofa atu foi i lau afioga i le Loia Sili faapea foi le vasega o Loia, aemaise o Ofisa Sili o Pulega o Matagaluega ma Faalapopotoga Tumaoti, ae le gata foi i lea o le paia maualuga ua sasao i lenei taeao aua le Fonousu a si o tatou atunuu. Fai mai le tagi a le tamaitai i lona alii na faufautane i ai, e fia fau so'u fale e lau i ula ae pou i toa, e aso i le unu ae pae i le leifanau o lo o ia Faasavalu. Na alu lotulotu le tama o Amoa talu le alofa, tautua o'oo'o, a se ua lau i ula ae pou i toa le aso aua o lele ua nofoia le... ua aina foi mauga mapuepue. O le faamamafa a le e EFKS po o le manatu autu i le tusi faitau aso i le sapati ananafi, o le mauga paia, o le mauga fiafia. E faatusaina ai lenei aso totonu o lenei malu o le mauga fiafia e ao ia te i tatou uma o sui usufono mamalu mai itumalo taitasi e 51 tau ina tatou maua le loto fiafia aua tasi lea vailaau e maua ai pea le malosia ae o lo o faaosofia moegaluaga ia maua lo tatou fiafia, ae a le fiafia le tagata o lona uiga foi ia faatiapolo o lo o i ai ae a fiafia o lo o Iesu i se aiga faapea foi lenei malu.

**FOFOGA FETALAI:** Ua ou vaelupeina le saunoaga a le sui usufono mamalu o Lefaga ma Faleaseela talu ai ona o lea ua tatou taunuu mai i le tatou malologa o le taeao, o le mea lea, faaauau le saunoaga a le sui usufono mamalu pe a tatou talii mai i le malologa. O le a faataatiaese galuega a le Fono Aoao mo le malologa o le taeao.

*Na faataatiaese Taualumaga a le Fono Aoaofaitulafono mo lana malologa masani i le itula e 10:45 i le taeao ma toe faaauau i le itula e 11:24 i le taeao.*

**FOFOGA FETALAI:** Ou te faasilasila atu ua toe amatalia nei taualumaga a le Fono Aoaofaitulafono.

Ou te tapa lau Afioga i le Sui Palemia mo le lafo.

## **LAFO MO LE SUIA O ITULA FONO**

**Afioga Hon TUALA TEVAGA IOSEFO PONIFASIO (Sui Palemia):**

Lau Afioga i le Fofoga Fetalai, e fia faaleo le agaga o le faafetai e tusa ai ma le tapenaina o le tatou taumafaga i le taeao nei e le tatou Ofisa, o lea ua tali le sua a le paia o le Palemene, ua tea foi le galala o le tino. Ona i ai lea o se manatu, ia, atonu ua maua foi se faasiligamalosia e faaauau ai le tatou galuega i le aso. Faamalo faafetai i lau Afioga ae faapea foi le tatou Ofisa mo le gasesega o lenei taeao.

Lau Afioga e maitau atu ua toatele nisi o sui usufono mamalu o lo o fia saunoa, ae manatua foi o le Tala Faatatau Faaopoopo o le Tupe, ua na o se faaopoopoga mo le Tala Autu o Tupe o lo o faagasolo nei. Mo le lelei faagasolo o le tatou galuega, ou te tulai ai ma le faaaloalo lau Afioga e faatu le lafo, *Ina ia faataatiaese Tulafono Tumau 32 mo le suia o a tatou itula Fono mo le aso Fono lenei e faapea; O le a faaauau pea a tatou taualumaga seia aulia le itula e 1:00 i le aoauli nei, ona faataatiaese lea mo se malologa ma toe faaauau ai i le itula e 3:00 i le aoauli ma faaauau ai seia tolopo i le itula e 10:00 i le po a nanei.*

O le lafo lea ma le faaaloalo lau Afioga i le Fofoga Fetalai.

*Faaluaina e le Minisita mo Faatoaga ma Faiga Faiva.*

*Na faamaonia le lafo.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe (Nu.1) 2022/2023.*

**FOFOGA FETALAI:** O le a faagasolo le tatou galuega e tusa o le lafo ua faamaonia.

E faataatiaese a tatou taualumaga mo le malologa o le taeao o lo o saunoa le sui usufono mo Lefaga ma Faleaseela.

Ou te tapa ma le faaaloalo lau Afioga i le sui usufono mamalu, tulai mai e faaaauau lau saunoaga.

**Afioga MASINALUPE MAKESI MASINALUPE:** Faafetai mo le faaaauauina o le lauga foi a lenei sui usufono. Ou te le toe oo i le tulaga e pei ona i ai le faafetai foi a le Sui Palemia le maau foi o le Ofisa o le Fono lau Afioga i le Fofoga Fetalai. Malo faafetai, o le agaga foi lena o le sui usufono. Malo faafetai le faaaloalo.

A o le i aluloa se faamatalaga e tusa foi o lenei aso ma le lauga, e le umi foi, e ao ia ona se i ou pai i si o matou itumalo. Ia, mai le Malae o le Toto seia paia Mulivai ma Lalotoa e afio ai le paia o le Aiga Sa Tuala, o le Tama a Sa Tuala, tainane le Taulagi ma le Matua, alaalatai foi le Gagaeolo ma le Itu, le Fetalaiga a Tuisavailuu ma le Nofo a Ituaiga, tainane le Faleaana ma Polo e Fa ma tagata o le Vavau, tootoo o Maauga ma Nuuausala.

E fia pai atu foi i le tulaga pei ona i ai le galuega a le au Sa Levi, lau Susuga i le Toeaina lau Susuga Nomeneta Simanu ma le faletua, ia faapea foi le nofo a faafeagaiga o le tatou Pulega, malo le nofo tatalo. Ia tapuai maia se i fai se sao o le tatou itumalo aua le Tala Faatatau Faaopoopo o le Tupe Muamua 2022/2023.

O le nei Tala Faatatau o le Tupe e 8 Matagaluega e pei ona fuafuaina i ai lenei Tala Faatatau Faaopoopo, ma o lo o manaomia foi le faasoa tatau o le Tala Faatatau aua lava le 2022/2023. E le umi foi la i ai se faamatalaga ona e le o aofia uma le tele o Matagaluega. Pau o lea na o nai Matagaluega ia e auala atu i Minisita e faaoo atu ai foi se agaga o lenei sui usufono.

Lau Afioga i le Fofoga Fetalai, o le aso ananafi na tatala aloaia ai le polokalame faaaauau po o le compliance improvement plan 2023/2026 a lenei Matagaluega, le Matagaluega o Tupe Maua ma Tupe Totogi, mai luga o lana mission, to sustain progressive development through excellence in revenue collection enhance compliance and stronger border security. O le agaga taua e pei ona i ai lenei feau, ina ia mautu ma tulaga alualulelei le faagasologa. Mo le silafia o le Matagaluega lenei, o le fatu lea mo le tapenaina mai ma le sueina mai o seleni aua le manuia auiluma o si o tatou atunuu. Tasi la lea vaega e faamamafa i se faamatalaga, e toe paia ai le tulaga lea o le toe puipuia o tatou tuaoi, aemaise lava o ogasami.

E le o toe po malae i le tulaga o lo o i ai le tatou vaa o le Nafanua, ua lape foi lea auaunaga i le tulaga e pei ona i ai, aemaise lava la o le taimi lenei i le faagasologa lenei, o le puipuiga lava lea e faamamafa, o le vaega lea o le auala eseese mai o fualaa faasaina. Aua tatou te le o toe mailoa nei po o fea le auala mai aua o le upu moni lava ia, o le matua tele o le tulaga lea e i ai, ua auala eseese mai e le gata i vaafagota, atoa ai foi ona o lea ua le o malupuipuia le vaega lea, aua o le tatou vaa lea sa malupuipuia ai le tulaga e pei ona i ai le soli mai o le tatou tuaoi e nisi vaa, aemaise la o le asiasiga o tulaga ia i mea tau fualaa faasaina ma tulaga faapena ua ofi mai totonu

ona o le tulaga i le tatou faatamala. Ia, atonu o lea ua faagasolo i ai fuafuaga foi i lea vaega aua lava le tulaga lelei o si o tatou atunuu.

Ona ou oo atu lea i le Matagaluega o Fesootaiga ma Faamatalaga Tekonolosi. Ia, na o se tuualalo i le tulaga e pei ona i ai le taimi nei, aemaise lava le tulaga o lo o i ai nei tatou vaega tau telefoni, e pei ona i ai le Vodafone faapea foi le Digicel. O le tulaga e pei ona i ai le faagasologa o galuega i Fono Faavae, sa faapipiina ai a matou telefoni, ia ma internet i lalo o le Vodafone. O le taimi nei e faailoa atu o lea e afio mai lau Afioga i le Minisita, o le mea sili o lea ua e taunuu mai i fanua, o le tulaga e pei ona i ai ua avatu a matou pili, e \$4,000 le pili ae le i faaogaina, e le i faaogaina telefoni, a o lea ua avatu le pili e \$4,000. Ou te le o mailoa i nisi o Fono Faavae ma latou po o i ai se vaega faapea o tupu, lea foi sa i ai le matou faasea i le vaega lea, ona tasi lea tulaga e tataua ona i ai, ina ia gasolo e tatou te tapa muamua tulaga e pei ona i ai le faaleleiina o le fesootaiga. A o lea la ua tulaga mai i i, ou te le iloa po o fea o i ai le consultation o lea vaega po o le a le tulaga o lo o i ai ina ia manino foi Fono Faavae. Aua e pei e foliga i lou talitonuga, e pei e foliga o le \$1miliona lea ua taua pei o lea o le a taumafai foi lele e vavae atu ai foi se latou pito tele i le tulaga pei ona i ai le tau faasoina o le seleni mo le amataga. Ia, e lafo atu i ina i lau Afioga i le Minisita lea vaega ina ia faamanino le tulaga pei ona i ai.

Ona ou oo mai mai lea i le Minisita o Faatoaga ma Faiga Faiva. Ia e le tau selu atu. E momoli lava le faafetai tele i le tulaga e pei ona i ai le faagasologa. O le mea moni lava na amata loa lenei faigamalo e le o se tala e aveane ai, ia amata loa ona toe faaopoopo le lafupovi ina ia maua pea le sini autu lea. E le gata i lea o moa, o puua. O le mea moni lava o lea ua faatino le vaega lea ina ia foia ai le faafitauli lea ua aumai, o le tatou faalagolago i oloa mai fafo.

E pau o lea na o lau faafesili ma lau tuualalo ona e tasi lea vaega sa mamafa i ai sau faamatalaga i le amataga o le tatou Tala Autu o le Tupe, o tulaga i a tatou mailei. Atonu e faaataata a lafoga ae le malie ona o le tulaga ua faasolo lava ina leai ni faatoaga ona o meaituolo. Se na ona ou toe fesiligia lau Afioga i le Minisita, se i toe aumai lava le tulaga e i ai, aua sa avatu le faataitaiga, o lea ua uma ona faatino, e le o tulaga lelei. Ae pau lea o le vaega o lea e faafofoga mai si ou itumalo, ia, o lea la ua faaoo outou manaoga e pei ona i ai.

O lea foi sa talia le tulaga e pei ona i ai le faagasologa, o le fuafuaga o lo o i ai o se pa, fai se pa tele lava e puipuia atoa ai le itumalo mai le taofia o puua faalafua se i tulou le Maota ina ia aua ne i toe satia. Mo le silafia, o le matou itumalo le isi itumalo e numera tasi i le mea o le lelei o le talo, e le gata i le mapo, a o le lelei atoatoa.

Ia e pei o le vaega lea i le tatou Minisita o Faatoaga, aua ou te talitonu e te le malolo. A o le taua foi o le faaleo o le tulaga e pei ona i ai, aua le tulaga ua i ai i leni taimi. Ia, e...

**Susuga Hon Laauli Leuatea Polataivao Fosi:** Lau Afioga i le Fofoga Fetalai...

**FOFOGA FETALAI:** Ia, malie le sui usufono mamalu se i tuu atu le avanoa i le Minisita mo Faatoaga ma Faiga Faiva. Lau Afioga i le Fofoga Fetalai.

**Susuga Hon Laauli Leuatea Polataivao Fosi:** Faafetai. E maitau atu o le a see ese le sui usufono mai le Matagaluega, ae taua le faamalamalama. O le sui usufono mamalu sa saunoa i lana uluai lauga i le tatou uluai Palemene i le Lauga Faataupou i le mataupu tonu lava lea. Ua uma ona faasolo atu le faataitaiga muamua a le tatou Matagaluega o le SROS, na avatu ai le fausia o tatou mailei foi ia, se i tulou lava, faatusatusa i mailei foi ia o maile, tulou lava. O le tulaga se i faataitai po o le a le ata e mafua ai ona tulai le faafitauli. Ae ina ua faatulai le mailei muamua lea, o i ina na mautinoa ai, e le o se faafitauli ua na o Lefaga ma Faleaseela, ua mautinoa ai o le atunuu atoa lava lea ua tupu ai le faafitauli. Ona foi mai loa lea o le Matagaluega a le SROS fai suesuega, ua maitauina ua i ai le tulaga ua le toe popole le atunuu i le mea lenei o le toe malu o pa e malu ai meaituaolo, e malu ai ma manupapalagi ua talaloa solo le tulaga lea. O i ina la na iloa ai e le Matagaluega ua tatau la ona sii le tulaga o le isi auala e tatau ona fai. Ua agai tatou puua ma povi ma solofanua ua faasoloatoa. O le molimau na aumai, o le tuasivi atoa lea e alu atu i Faasaleleaga e tau i Falealupo, e matautia le lafu la e ua savavali i ina i tuai'a o mauga uma nei. O le taaloa lava o povi a le aiga ua leai, ia, faamaopoopo e le aiga lea ua feoi. O puua, solofanua ma mea uma faapena. O lona uiga, e le laitiiti la le faafitauli lau Afioga.

Ua tapa nei le fesoasoani a le tatou Matagaluega o Leoleo. Sa matou talosaga i le Malo o Ausetalia, e manaomia le fesoasoani ona o le faafitauli foi lea e tupu i native forests i Niu Sila ma isi atunuu o le Pasefika e i ai Papua Niu Kini ma Fiti. Ua aumai la le latou faatofalaiga mo le silafia e le Maota ma le Afioga i le sui usufono, o le a tatou toe liliu e fai le isi faiga lea o le faamaopoopo o le au tutuli, hunters. Ae ua agai le talosaga i le Afioga i le Minisita o Leoleo ma alii leoleo, e faaoga, tulou lava, leaga pei sa faataataa a luga le upu lea, pe faamata o ni leoleo e omai e tasu'e puua, tulou lava, ia ma tulaga ia. Ae ua alu alu suesuega, e leai se isi mea e tatau ona amata ai le mea lea, e tatau ona amata i le auvaega lea e i ai tatou au hunters a le Matagaluega, le vaega foi lea e o e sue fualaa faasaina ma le squad the K9 squad o lea e avanoa. O lea e ave nei le talosaga a le tatou Matagaluega, na pau lea o le auala vave ae galulue faatasi ma le Pulega a alii ma faipule ia i latou o lo o silafia tuamaota o lo o o agai i ai le lafu lea.

O le vaiaso lea na tea nei sa Fono faatasi ai ma le Komesina ma le Faauluuluga o le Poloketi lenei, o le a faaoga mailei e faaoga ai tatou taifau, faaoga ai GPS, e o taifau ia e tatai le au tutuli nei a leoleo ma le au tutuli tuufaatasi a nuu ona iloa tonu lava lea o le mea lea e i ai le lafu lea e tatau ona faaumatia. O le faamoemoe o le auala vave lava e vave ai ona tuu i lalo, slaughtering e vave ai ona faatamaia manu la nei faalafua o puaa aivao, o povi aivao, ma nisi tulaga o lea e aafia ai.

O faamaumauga lau Afioga i le Fofoga Fetalai, e matua tele le aafiaga mo le aufaifaatoaga. E leai ma se tatou talo po o se tatou taamu po o nisi lava fuafuaga e toe maua pe a faapea e tatou te tuutalaloa mea ia.

Ua talosaga foi le Afioga i le Minisita o Leoleo ma le Matagaluega o Leoleo ina ia faatuina loa se faalapotopotoga faapea. O tatou lava ia i nuu i tua, e i ai lava le au tutuli, e i ai lava tagata ia e o e fai le faiva lea o le tuli manu aivao i totonu o nuu ma afioaga. Ma na o latou foi ia latou te silafia lelei lava o latou tuamaota o lea e o agai i ai aiga nei. Ae ua manatu faaopoopo atu ma le Matagaluega o Leoleo, ia ona iloa loa lea ua vave ona foia le faafitauli.

O le isi faafitauli lona lua lau Afioga i le sui usufono, ua toe talosagaina le mea lenei o le toe uu e le aufaifaatoaga o laau malosi, ina ia omai lelei e toe resitala lelei latou, toe faamaopoopo le latou uuina o laau malosi faatagaina, pulu tasi ma le sefululua.

O le mea lea na tupu i le Paeaiga lea na tea nei, ua o atu lava le Malo ao mai fana faaleaga loa, a o nai mea ia, sa nofonofa ai lava le faifaatoaga ia ma leoleo lana faatoaga. O le taimi la lenei, ua matua leai lava se mea e tua i ai le aufaifaatoaga. Ia, ona o tulaga foi sa i ai le mau e le laiseneina, faasaina ma tulaga faapena. A ua ave le tuualalo i le aufaifaatoaga, faamolemole, resitala loa ma omai le Matagaluega e fai aoaoga ina ia malupuipuia foi le mea lea o le faaogasese o fana, o lea ua tatou iloa lava ua i ai foi le malaga a le maliu ma le oti ona o le faaogasese. A o le foia lava ia lau Afioga i le Fofoga Fetalai, a tofu lava le faifaatoaga ma lana auupega e puipuia ai lona maumaga po o lana faatoaga, ia ona manatu lea ua saogalemu lea. Ae ua manatu lau Afioga i le sui usufono e le o moenoa ai le tatou Matagaluega. GPS is the latest technology lea ua aumai, lea foi ua faafofoga mai le Komesina o Leoleo, ia ma le faamoemoe, ina ia taumafai e tapue le mea lea.

E avea foi lenei avanoa lau Afioga i le Fofoga Fetalai e avatu ai le talosaga i le pule mamalu a alii ma faipule, faamolemole, se i tautuana ifo, e le aoaia e Laupua Tamafaiga. I tulafono a nuu, ua tatau ona le toe i ai le mea lenei o le taaloa o tatou manupapalagi, o a tatou povi ma a tatou puaa. Faamolemole, faaoga le poloketi lea o le tatou \$1miliona e faatau atu ai uaea e sio ai fanua ma faamalu, aua o puaa lava ia sa tatou fafagaina ua o loa i tua, ia ua faatiutalaloa ma o atu e faaleaga uma a tatou meatoto.

Ia, o le faamalamalamaga lea lau Afioga, e le o mapo le atinae atu, ae avatu lau faamalosi, e oo lava i le helicopter lea na e taua. Ae se i tatou savavali muamua e sue puua po o fea o i ai ia ona maua ai lea o se fesoasoani mo tatou itumalo. Ma le agaga faaaloalo.

**FOFOGA FETALAI:** Malo saunoa i lau Afioga i le Minisita. Atonu o lea ua faafofoga foi le sui usufono mamalu, ona o lea lava sa finau mai lava i le amataga mo nei lava atinae, a o lea ua faafofoga, o lea e tele lava auala. Ia, ae tulai mai le sui usufono e faaauau le saunoaga.

**Afioga MASINALUPE MAKESI MASINALUPE:** Malo faafetai, faafetai mo le faamalamalamaga o le vaega lea e le Afioga i le Minisita, o lea la ua maua le toafilemu, e le gata i le sui usufono, ae faapea foi le tatou itumalo o Lefaga ma Faleaseela, o lea lava ua faaleo le tulaga o lo o atugalua ai le afioaga ona o le tulaga lava lea e pei ona i ai.

O le a ou le oo tele i le tulaga lea, aua o lea foi sa ou faamauina i lalo le tulaga lava lea sa sologa lelei lava i ia vaitau ona sa tofua lava le faifaatoaga ma le fana, e savalivali lava i tua e vaai le... a o lea ua taua e le Afioga i le Minisita ia o le mea lea o lea ua tupu, ua le iloa po o le a le ituaiga, po o fea le mea o le a tapa i ai le faifaatoaga e faalalo ai manu faalafua ia. Ae faafetai o lea ua manino foi ma ua malamalama le tulaga lea e pei ona i ai, e le malolo pea le Matagaluega aemaise o lau Afioga i le Minisita i le tapenaina o lea vaega. Atonu ua lata se taimi o le a le toe vaaia ai nei manu faalafua aua le faaleagaina o faatoaga.

Ia, o nai manaoga lava o si o matou itumalo e faaleo mai pea ma faapea mai, lau Afioga i le sui usufono, o le a ea le tulaga o lo o i ai nai o tatou manao ia e avatu ia te oe? Ai lava o e alu atu ma e nofonofu.

Ou oo i le Minisita o Galuega Tetele. Lau Afioga i le Minisita, e talitonu lava e faatino lava tulaga e pei ona i ai. Na pau lava o le mea o le fai o si umi ona faatali. Ia atonu ai e faamalulu atu foi, ai o le tuai o seleni e faatino ai ia vaega. Ae ou te iloa lava a faa-5 faa-10 ona faaoo atu i ina, ia atonu o lena foi e fuafua i ai lau faatatau aua ne i te i ua e manatu e avatu e faapula i ina, ae malie lou finagalo se i tau i ai lava sina taimi, a pao lava sina masini po o le a lava, ua matagofie. O auala ia o si o matou afioaga, e na ona toe faaleo atu. E moni lava e le o lava se tupe i le Tala Faatatau Faaopoopo ae na ona toe faaleo atu aua o la e faafofoga mai si o matou itumalo. O auala lava ia o le afioaga o Faleaseela, o Matafaa i le mauga, o lea foi ua uma ona asiasia auala e le matou Komiti, o Safaatoa i le alu i tai, o Matautu ma Gagaifo. Ou te iloa e tasi lava se vaiaso pe lua vaiaso e tu ai masini uma lelei lava lea ona fai ona toe faafoi mai lea o... ae pei aua e le mamao tele foi le savaliga o masini i totonu o nei auala. O auala lava ia e pei ona atugalua ai ona o auala lava ia e puipuia ai le saogalemu...



**Tofa Hon Olo Fiti Afoa Vaai:** Lau Afioga i le Fofoga Fetalai...

**FOFOGA FETALAI:** Malie le sui usufono mamalu se i tuu atu le avanoa i le Afioga i le Minisita mo Galuega Tetele.

**Tofa Hon Olo Fiti Afoa Vaai:** Faafetai i lau Afioga i le Fofoga Fetalai. Ua faalogologo foi ma le totoa i saunoaga a le Afioga i le sui usufono mamalu mo Lefaga ma Faleaseela. E pei e foliga foi lea e malu foi ae ivia le saunoaga. Ae tau lava ina ou faamanatu atu i lau Afioga, ia lavapapale pea mai i le tulaga o le tau faasoasoina o nai seleni o lo o maua foi e le tatou Pulega o Felauaiga i le Laueleele. E i ai lava nai mea o lo o taiala ai le matou galuega foi lea i totonu o le atunuu atoa, le mea foi lea ia leai se manatu faapito, a ia faasafua tutusa galuega a le tatou Malo.

A o maitau mai lau Afioga e le o se tulaga faapena o taofiofi ai le vaega lea, ae a maitau mai e le tatou atunuu le tulaga foi o le itumalo o le Afioga i le sui usufono mamalu, tasi lea itumalo ua tele foi le sao o le Malo i alatetele, ma ua faata faalua, faatolu auala. Ae o le tele ia o nisi o alaalfaga o lea lava e anau mai se faaleleia ma se i faata se auala se i savavali ai nisi foi o latou alaalfaga.

O le mea lea ou te faamalulu atu i le sui usufono e le o faapula i i le talosaga, ae o lea lava se i tau koma outou se i tau faasafua atu le fesoasoani i nisi foi o alaalfaga ua leva, o lea foi ua ou vaai i ai, e le i i ai lava se mea e tau o se sua, vaeatu le faafogafoga a le Maota ma le faafogafoga a le atunuu e le i faia lava se galuega i ai.

Ia, atonu e onosai mai pea, atonu e le i uma lenei Paeaiga ua toe oo atu le faasologa i lau Afioga ma le tou itumalo, ia ona faata faafa ai loa lea o auala na e pei ona e saunoa i ai. Ma le faaloalo.

**FOFOGA FETALAI:** Malo faafetai. Ia atonu e taua foi fautuaga a le Minisita lau Afioga i le sui usufono mamalu, leaga e fai si toatele o le tatou atunuu. Ia ae malo lava le onosai. Ia, faaauau mai le saunoaga toe 2 ou minute.

**Afioga MASINALUPE MAKESI MASINALUPE:** Pei lava e le i taitai ou minute a o lea ua... ia, e faamalulu atu i lau Afioga, tulou lava ou paia. Ia, e le tee le sui usufono i le... aua le saunoaga i lau Afioga i le Minisita, o lena e i ina le pule, o lena e i ou aao le tulaga e pei ona i ai le faagasologa. Na pau lava o lea, ia e faamalulu afai foi ua paopapa se faamatalaga a le sui usufono, ia e asuasua atu vaimalu i puega. A o le tulaga lava ia pei ona i ai, ia, o lea ua faafogafoga mai si o matou itumalo o lea ua faaleo, o le a lava se taimi, aua e talitonu o lea e le i uma le Paeaiga lea, ia onosai mai pea, mau le toovae aua le faagasologa o galuega.

Ia, e le o taea auala ia lau Afioga pei ona e taua i faiga faavae, ae pei o auala lava ia mo le faasaoina foi lele i tai i taimi o Tsunami, o auala lava ia e omai agai i uta i le tele o isi tagata o lo o nofoia. E pei o le mafuaaga lea o le i ai o auala ia o nuu ia. A o le auala lava ia le main road, ia faafetai o lea na faatino lea vaega ina ua uma atu le faagasologa o le palota e pei foi ona taua e nisi sui usufono. A o le tulaga lena, ua malie foi le sui usufono pei ona i ai le faamalamalamaina o lea vaega.

Ia, toe tasi lava le Minisita lea na o le Minisita o le Soifua Maloloina, lau Afioga Doctor, e i ai lava le talitonuga tasi lea Minisita mataala, e alu lava ana asiasiga ma faasolo. O lea foi ua tatou maua nisi falemai ua sosolo ai vao, ia, o lea lava ua maea foi ona oo i ai le asiasiga. A o si o matou itumalo, ua fai lava si leva ona tuua e leai se falemai, e fai lava si toatele o le fuainumera o le matou itumalo, a o le tatalo lava lea pei ona avatu. O lea foi ua uma ona faaoo atu, o lea foi ua malamalama e pei ona e saunoa, o lea foi ua tapena le fanua e faatino ai, toe lava o se vaega foi lea e lagolago ai le matou talosaga, ia ae o lea lava ua maea ona faatino vaega ia mo le faatinoina. O le tulaga e pei ona i ai, ua ofo mai nisi o fanua i ina i Matautu, aua e tele foi aiga o lo o manaomia e faatino i o latou fanua, ae o lo o i ai lava lona lape, e fai si latalata o Matautu i o i Saanapu. O le agaga lea e i ai, ia maua se fanua e ogatotonu i ai Lefaga, ona faatino ai lea o se vaega lea, ma o lea foi ua maea ona tapena vaetu lau Afioga i le Minisita.

Ia, o le faaleoina lea o le vaega lea e tusa ai o le falemai, mo le silafia o le tasi lea vaega taua mo le soifua maloloina, aua e le talanoa nisi ma ni gasegase, e i ai lava taimi e faafuaseia ai ona aafia tatou, a o la e i ai se falemai e tau latalata ane e tua i ai le itumalo.

Ona o lea ua toe lua ou minute, ae ou te iloa ua lava lea. Faafetai i lau Afioga i le Fofoga Fetalai mo le avanoa. Ia manuia tele lau Afioga, ia maua pea le tofamamao aua le tau faafoefoeina o le tatou Fonotaga. Ia alofagia foi le Kapeneta, ia maua pea le soifua manuia, maua le onosai. E le mama la outou galuega aemaise o la outou pitolaau i le faatinoina o fuafuaga i lenei vaitaimi, aemaise o le tau togitogiina o tatou aitalafu. E faapena foi i lena Vaega, malo le onosai, malo le lavapapale, e tusa ai o le faagasologa.

Lau Afioga a o le i faamaeaina, lau Afioga i le Minisita o Tupe ma le Matagaluega, e momoli tele atu le faafetai mo le polofaaso. Ia alofagia e le Atua ia maua pea le malosi o lau Afioga maua le tomai, aemaise foi o le Matagaluega i le faatinoina o lea vaega. Ma le faaaloalo lava. Ia manuia le tatou Fono.

**FOFOGA FETALAI:** Malo faafetai malo saunoa i lau Afioga i le sui usufono mamalu mai Lefaga ma Faleaseela. Malo lava le finau foi i mea o lo o manaomia e le itumalo. Ua faafogafoga mai foi le itumalo, ia o lea lava ua faaleo. Ae malo lava faafetai mo le faaso foi i le tatou Tala Faatatau Faaopopo o le Tupe.

Ia, o lea ua maitau atu o lea ua fou mai le sa o le sui usufono mamalu mo Aana Alofi Nu.3, lau Afioga i le Minisita Lagolago o Aoga. Faafetai foi o lea ua taunuu mai i fanua le faigamalaga foi a le Minisita o Aoga sa i le tatou motu i Tutuila, ia o lea ua tatou feiloai fiafia i lenei aso, malo le malaga manuia i lau Afioga i le Minisita.

**Afioga AGASEATA VALELIO TANUVASA PETO (Aana Alofi 3):** Faafetai i lau Afioga i le Fofoga Fetalai i se avanoa taua foi e tulai atu ai lenei usugafono e faaleo se lagona po o sona sao foi i le atinae o lo tatou Malo. O lea foi ua e faamauina le malaga manuia o le Afioga i le Minisita o lenei Matagaluega, e faapena foi so matou lagona, malo le malaga manuia.

Ua paia Faleseu, aua ua maua le aloalii, ua malumaunu foi le fogatia aua o lele ua faaifo le tuamafa filimafua. Ae a le fuifui o le vateatea i le paia lele ua sasao nei. Matou te faatalofa atu, i lau afioga i le Fofoga Fetalai, le mamalu o le Palemene, Talofa i lau Afioga i le Sui Palemia, mamalu o le vasega Kapeneta. E faapea foi ona matou faatalofa atu i le vasega mamalu i le paia i Minisita Lagolago. I lau susuga i le Sui Taitai o lena Itu faapea le paia maualuga o lena foi Itu.

Matou te faatalofa atu foi i le paia maualuga aua foi Ofisa Sili o Pulega o Matagaluega, le Loia sili ma le tou ofisa.

O paia o Samoa o lea ua uma ona taoto, e manatu foi e le toe oo i ai se taofi. E manatu e le toe oo i ai se taofi o lea ua faatulima i ai lau afioga. A o lea ua poto moli i futiafu e tasi, aua fai mai o le taeao e tali seu ai, a o lona afiafi e te talisua ai, o le alofa lena o le Atua. E i ai le agaga taumulimuli le agaga o le faafetai i le tapenaina e lau susuga i le taitai o le fono.

Le paia o le itumalo, Nofolii ma Leulumoega Aana Alofi 3 tapuai maia ma se manuia, ae se i fofola so tatou lagona so tatou sao ia Manua, aua le Tala Faatatau 1 o le tupe 2022/2023. Sa fou lava a Mao pe solomuli a galo, aua e fai o le naunau ae taofi, nei le faaleoa foi se lagona o le itumalo.

E muamua ona momoli le faafetai i lau afioga i le Minisita o Tupe ma le Matagaluega, o la outou faasoa ma la outou lufilufi limalelei, aua lava le tauavameaina o masina mulimuli o lenei tala faaletupe, e tauala i nai Matagaluega ma latou manaoga e fia faataunuina ma faatinoina i toe masina o lenei tausaga faaletupe, malo le faasoa, malo le uta.

E 8 lava Matagaluega e pei ona i ai le latou tatalo, a o le fetuutuunaiga e mai Matagaluega e 4, malo le faasoa. O le ala lea o le momoli atu o le faafetai tele Ae o nai vaega nei e tuutuu atu si o matou lagona, poupu ma faufau ai lo tatou sa, aua lava le atinaeina au i luma ma le manuia o lo tatou atunuu. E matua lagolagoina e lenei usufono le toe fetuunaiga e ala i le review e pei ona faatinoina e le tatou Matagaluega le PSC, ae auala atu ai i i se tuualalo. Atonu e aoga le toe lauliliuina ma le toe vailiina o galuega

faatino ma e faapena ona fitoitonu ai, e pei ona i ai lenei Matagaluega, i le tulaga o Asiasiaoga. E tele le galuega, ae faafetai o lea ua maua ua i ai, ma ua taliaina le faaopopo, e pau lava o lea o le galulue faatasi. O le remuneration tribunal e mo le vailiina o le a? sei toe silasila ane lava i nai totogi o asiasi aoga. Aua o le lima taumatau lea o le Matagaluega, i le feagai ai ma faiva ma tiute, aua le atinaeina o le fatu lea o le manuia, au i luma o le atunuu, i so o se atunuu lava.

E tuuina atu ma le agaga faaalolo i le vaega mo le faatalanoaina o puleaoga ma pule lua, ona o le matau i ai i fatia ua sola, o le isi lea toa, ona o le toagaogao o le aufaigaluega e faatinoina le faatalatalanoaina o avanoa o puleaoga. Aua foi o tofiga ia, o tofiga ua faakonekarate, ae o le matou manatu ma lo matou vaivaiga, e a pe a toe tuu, tuu atu i le pulega ma le Matagaluega o lo o i ai le silafia atoatoa i lana aufaigaluega, ina ia faapena ona faatino ai e i latou le faatalatalanoaina o avanoa puleaoga, pule lua. O le agaga ina ia faafaigofie ma vave ona faatumuina ma faataunuuina nei avanoa e pei ona avanoa ai puleaoga. O le augani lea, ma le tatalo lea.

O le Minisita ma le Matagaluega o Alamanuia ma Leipa, ua lasi saunoaga faatofalaiga ina ia faapena ona faufau ma poupou ai, o le isi lea alamanuia o le tatou atunuu, e ala i alo ma fanau ma avanoa faigaluega faavaitaimi. O le matou tatalo, o lea ua faatalanoaina avanoa e pei ona i ai, e faatinoina ia fuafuaga ma le vaaiga o alo ma fanau nei, i le Malo o Niu Sila, ae o le matou tatalo, pe le i afea ane i so outou finagalo e ala foi i le review lea, e tuuina atu ai se isi e toaluaina ai le galuega e faatinoina e le Malo o Ausetalia, e vaavaalua ma le tatou Matagaluega ina ia faafaigofie le mataituina aua foi le fitaituga o alo ma fanau i a latou foi galuega.

O le lona lua o le matou tatalo ma le matou foi fautuaga, o avanoa nei, ia pei ua lilifa lava i le tagata e toatasi, ae o le faasoatutusa ina ia tutusa avanoa ina ia faapena ona atinae faatasi ia aiga o le tatou atunuu, e ala foi i lea faamanuiaga. O le ala lena e fautuaina ai, ia tuu mai ia i ai le leo o le komiti faafoe po o le komiti o le fono faavae, e lava lo latou silafia i alo ma fanau o le itumalo. Ina ia tutusa le silasila, maua avanoa o nai aiga taitasi ina ia faapena ona maua ia manuia.

Lau Afigoa i le Minisita o Faatoaga ma Faiga Faiva, o le faamaite ma le taulogologo e manatu, e tu lava manu ae le tu logologo. Faafetai i lau tofa, o lau faatofalaiga ina ia faapena ona manuia tutusa ai le atunuu, e ala i le a? E ala i le fautua, timai, o i o le tali lea o faafitauli tau le tamaoaiga, tau o le tupe maua. Ia lava taumafa, e faapena foi le.....logo lelei aiga taitasi o si o tatou atunuu. E pau lava o lea, lau afigoa i le Minisita, o uluai seleselega ma lau faatofalaiga, ae ua manatu, e a le mea e le tuu atoa mai ai le seleni lea. E eseese manaoga ma le tali, e i ai le aufaifaiva, e i ai le au galulue i le atinaeina o le laueleele, e eseese manaoga. Ae i ai le manatu, o le faatosina ma le faafiafiaina e ala i le tuuina atu ai o seleni ia, e ala i le faapolokalameina, e le itumalo lava ia. E i ai le manatu o le faaosofiaga foi

lea, e saga faaauau ai pea, o le tatou foi galuega i tua i le atinaeina, o tatou laufanua ma o tatou eleele. E pau lava lea o se talosaga mo lau afioga i le Minisita.

I lou tilotilo ma lau vaai e ala i manaoga o lou itumalo, ua faapena ona faaoo atu, aua le tapenaina i le faamoemoe pe a taunuu atu le atinae o le tai miliona, ua ou tilotilo i le manaoga. Ona ou fesili lea i tatou supplier, o masini ma mea e faaoga e le aufaifaatoaga o lava. Aua foi e le na o Aana 3 e i ai manaoga nei, o Samoa atoa. A oo nei ina taunuu faatasi atu ia seleni nei mo le faatinoina, a o manaoga nei, e faapena ona faataunuu faatasi mai foi ia vaega o lo o supply mai ai, ae le o lava, ona faatuai ai foi lea o le tatou poloketi, galuega manaomia mo le faatinoina. O le ala lea, se i silasila ane i lea vaega. Ona faapena lea ona oo ifo se lagona ma se tuualalo i lenei itumalo e ala i o latou manaoga.

Ua maea ona faapena ona fofola atu se sao o lenei itumalo, ae tau ia ina matou faapea atu, ioe ma talitonu le taofi i le Tala Faatatau Faaopopo o le tupe o lo o i ai nei, e le o i ai se tupe faaagaga mo atinae nei. Ae ui i lea, e aoga foi lo matou talanoa atu, ma avatu pea so matou talosaga....

**FOFOGA FETALAI:** Malie le sui mamalu sei tuu atu le avanoa i le Minisita o Faatoaga ma Faiga Faiva.

**Susuga Hon Laauli Leuatea Polataivao Fosi:** E manatu o le a see ese le sui usufono o le Minisita Lagolago foi ma le saunoaga a le Matagaluega. O le tausaga lenei, o le lua tausaga lenei o le faiga o le tatou faiga fou lenei o uluai seleselega mo itumalo uma lava e limasefulutasi o le atunuu. O se faiga fou, tatou te manatu ai, ina ia tutusa avanoa, o le aufaifaatoaga, fai faiva ma le au failafumanu. Sa tatou omai uma lava e tasi le tauvaga ia Tumua atoa, e fai i i, i Malaefatu, tasi le taivaga sa fai i Salelologa. Ona fuli ai lea o le tatou tofa, o le a faasafua uma le onoselau afe, lea e faaagaga i tausaga uma ina ia alu sao lava le fesoasoani i luma o tagata e ona le faaaliga. E matau i tausaga ua tea, e uma ane lava le tupe, e alu i faleie alu i meaai, e alu i seminar e alu i isi mea. O lea faatoa tatou oo nei... a vaevae le tatou 600 afe lea, e tai 10 afe a le itumalo, lea la e faataavili atu nei. Ia malie le sui o tatou faiga faavae mo le tausaga lenei, ou te tatalo atu ia tatou onosaia ia usitaia, o le mea lava lenei o le avatu o le tupe e faigofie tele. Oka, a mea o le ula lena o faigamea e leai se galuega a le Matagaluega na ona o atu lava avatu tupe. ae o le a le faafitauli lea e feagai ma tatou? E na o le alu atu lava tufa loa, le tufa lena o lea tatou te felauai ai foi finagalo ma manatu ma lagona. E oo lava i le tatou poloketi o le miliona ua tufa, o le faafitauli lena lau afioga i le sui usufono. Ia onosai, e lima tausaga, e lima tausaga o le tatou uluai seleselega. Se i tatou faataavale nei i lenei uluai tausaga muamuam sei mataitu le Matagaluega ma silasila pe faamata e tafa le finagalo o alii ma faipule ma itumalo, ia

faaoga tatau tupe a le atunuu. E le o se tupe a lo tatou Faigamalo, o le afu o le atunuu e tatau ona limataitaiina i faiga faavae e faamatuu atu ai tupe.

Ia malie lau afioga i le sui usufono, ou te le teena pe tali lumafale lou finagalo, ae o lau tuualalo tatou silasila mo le tausaga fou. A oo atu lava ua fua mai le fia selau afe koko, popo suotipi o a uma mea na e avatu, a mea o le ula lena. Ola lelei au faisua, o au tilapia, o au aliao, o a uma mean a e avatu, e alu atu lava le asiasiga e toe vaai. O le fua la lena e vaai atu, o lea e fua le mataupu. Ae o le o atu lea i le tausaga fou ae o atu e leai ma se mea o tu mai, ona alofa ai lea i le tulaga lea e tau faataavale atu. E le aoaia e Laupua Tamafaiga o la e faafogafoga mai le atunuu, o la e i ai le tofa, ae na ona tatou faaoololomaau ia Samoa. Se leaga e faigofie lava le upu lea e lele nei, aumai tupe i le atunuu, aumai ona a lea? Na ona sau lava manava gone tomorrow. E leai ma se mea e tasi e fua a le Matagaluega leai ma se mea e tasi o lo o faasoa.

O le tulaga i le mea lea e te saunoa i ai i masini, sao oe. E leaga o lea o le a tatou naunau uma e faatau a tatou pauaea, pamoia papuaa paoti pamamae, o a uma ituaiga uaea eseese o lea o le a faatau. Ae o le lalolagi lea tatou te i ai, go on Alibaba. E te maua ai mea sili ona taugofie pe afai ua le maua iinei. O lena e ia oe, your are Mr Chairman, e te iloa mea e maua ai mea taugofie mo lou itumalo, na e te silafia. E na ona ou fautua atu faapena, e avatu ai foi le tuualalo ia outou uma nei e le i faia lava ni uluai seleselega. Ou te le iloa pe o le tou le fiafia ia au o le Minisita po o le tulaga faapena. Ae a e manao e mau lou itumalo, ia o lea ou te faatalitali atu. o Iuni e uma ai le paketi lea o le tai sefulu afe tala lea. Ae o lea o le a oo i le isi paketi e toe maua mai ai foi le isi tatou sefulu afe. Tou te le faatali seiloga e matua mau le tou nuu ona fai lea, whatever you have ona fai loa lea e amata ai. Ae le o le faapea ua e ma i te i ua e alu atu aumai mea mai le isi itumalo faatau i lau talo mua, e le o agaga lena. Ae ua ou manatu lau afioga i le sui usufono, o lau tatalo foi lena, ae ua aoga lou laga, e avatu ai le talosaga i le la Itu o le Malu, e agai mai, soso mai i totonu, soso mai o lea lava e fai atu le faasoa, e ui lava ina tele tala ae fai atu le faasoa. Ma le agaga faaaloalo.

**FOFOGA FETALAI:** Ia malie le sui usufono mamalu, se i tulai mai le tama matua ia Sala po o le a foi sana fesoasoani.

**Afioga Hon Sala Fata Pinati:** E momoli atu le faafetai i le Afioga i le Minisita o Faatoaga, se ua logo tino lelei i lenei taeao ua tatou tofo i matagi malie matagi malu i lenei taeao, i saunoaga matagofie, a mea o le ula lea o faigamea ua saunoa i ai le Minisita, faafetai. O le tupe na avatu na avatu ia matou e 200 afe, o le tupe lea e totoe pe a ma le 90 afe. Mai le luaselau afe lea e i ai le vaega lea e totoe, ae ua uma le matou fale, pe a ma le 35 afe le tupe na alu e faafoe ai le fale lea o au e i ai nei. Ae ua maea e le i i ai se 100 afe na alu ai. Ae o le lagolago... se matou te fia pipii atu i lau afioga, e

fia ola foi. Ae aveaveai le tatou galuega lea, tatou ave le faamuamua i le Minisita o Faatoaga, le Minisita o Galuega ma le aiga Minisita. Ia manuia le usugafono a le atunuu.

**FOFOGA FETALAI:** Atonu o lea ua talia foi e Sala le uluai seleselega atonu o se taimi ona faataunuu lea. Tulai mai lau afioga i le Minisita o Galuega Tetele.

**Tofa Hon Olo Fiti Afoa Vaai:** O se mea e fia fasao i le saunoaga a le Minisita. O lea ua faapea mai o matou ia e le i faia uluai seleselega ua matou le fiafia ia te ia, a o le upu moni lava e le i faia sau uluai seleselega, a o lea lava ou te fiafia i ai.

**FOFOGA FETALAI:** Toe tulai mai lau afioga i le Minisita.

**Susuga Hon Laauli Leuatea Polataivao Fosi:** O lau upu lea na fai o o, Sala, e le tau faafuluina lau tofa ona o oe le isi toe Ulutaia o le Maota. A i ai se tagata e sili ona ou talitonu i ai i lena Itu, o oe. E tau faaletonu lava pe a e pipii ia Lautafi ma Fonotoe, ae o oe o le one of the honest cleanliness politician I ever knew, ioe o lea e te silafia. O mea uma na tatou feoai ai ma faitonu faatasi ai, e silafia e le Atua, ae fesoasoani ifo, o lena e i ina le tofa ma le faautaga.

**FOFOGA FETALAI:** Ona o lea ua taua le suafa o Satupaitea....

**Afioga Hon Lautafi Fio Selafi Purcell (Satupaitea):** E sao ai le upu foi lele, ua aafia fua le maaveave le fua. E leaga e sao lelei le saunoaga a le Minisita. Na ma talanoa foi i le Aso Faraile, o lana tala foi lea na fai mai ia te au, na o oe lava ou te talitonu i ai, a o lea ua see ese ia Sala si ou uso. Ia faafetai i lau afioga.

**Susuga Hon Laauli Leuatea Polataivao Fosi:** Ia toe faafoi maia lau upu ae ave ifo ia Loau, atonu o lena e manino ai le faamatalaga. Ia manuia le lauga Aana.

**FOFOGA FETALAI:** Se i tulai mai, leaga o lea ua taua le suafa.

**Afioga Hon Loau Solamalemalo Keneti Sio (Sagaga 1):** Ioe, o le tala foi lea e tasi, na ma talanoa foi, Loau na o oe lava ou te talitonu i ai.

**FOFOGA FETALAI:** Tulai maia le sui usufono mo Aana Alofi 3.

**Afioga AGASEATA VALELIO TANUVASA PETO:** E faafetai i lau afioga i le Minisita, o i lea ou te iloa ai nei, e taua si au mataupu lea na avatu. Lau afioga i le Minisita o Galuega, aso 28 Aperila, o le aso lena ua atofaina e lenei itumalo mo lana uluai seleselega, se i silasila foi po o a ni fua o faaeleleaga ua faapena ona oo i ai lenei itumalo, ae malo faafetai.

Ona oo mai lea o se lagona o nai manatu ma talosaga a si nei itumalo, e avea foi lenei taimi e momoli ai le faafetai tele i le fofoga i le vai, ia Taimalieutu Tanuvasa Chalie. E tele lana fesoasoani ma lona tauau, lafo atu e atinaeina le nei itumalo. E ese le mea e tau o le upper alafaalava ma le lower alafaalava, o faamaumauga ia o lo o i le faafanua a le Matagaluega a le MNRE. O le upper alafaalava o le alafaalava lea e agai mai Aleisa ma taunuu atu ai i le alamaligi a Leulumoega ma agai atu ai i Lefaga. A o le lower alafaalava, o le isi alafaalava lea e agai atu lava i Apia ma taunuu i le alamaligi ua taua i aso ia. Ua ou taua leaga o lea na matou asia ma le Minisita i ana asiasiga. Lau afioga i le Minisita, o le fesoasoani lena a lenei nuu, i lau Matagaluega, o lea ua maea ona suaina faaleleia le auala mai lava i le upper alafaalava lea, seia toai taunuu i le lower alafaalava lea. E pau lava le tatalo, sei toe faaauau atu ia le auala galue a Nofolii o lo o agai atu i le faleaoga sei faaauau atu ia i le lower alafaalava lea. Ua e silasila i tagata ile toatele o nai aiga o lo o i ai. A o le mau foi, e pei e faaauugata ona o lea e faaletonu aualagalue, e pei o le tatalo lena. I i lava, o lo o i ai nai aiga e pei ona tatalo atu i le latou vai, e le fesootai mai le latou vai inu mai Fasitoota po o Leulumoega uta foi. O lea ua faapena ona oo i ai le auaunaga a le suavai. A o le agaga lena o le faafetai, o le tauau tuu atu, e le gata ina fesoasoani i le tatou Malo ae faapena foi ona fesoasoani i lenei nuu, aua o lea ua mafai ona feoi ai nai taavale a nai aiga i le mea tonu o lo o faapena ona galulue ai. Ia o le tatalo lena.

O Nofolii, i le latou auala galue lena ua matua faaleagaina lava, le aualagalue lea e i tafatafa o le maota o le faafeagaiga e tau faafesagai ma le falemai. O le agai atu lava i le aai seia tau i le alafaalava lea ou te taua o le auala faalava lower alafaalava, ua aiga loaloa, ua faatoaga loaloa. Ae ua matua faaleagaina lava, o le tatalo, e pei ona fai atu, e aoga foi lo matou talanoa muamua a o folifoli mai le tatou Tala o le Tupe Autu mo lena tausaga fou, e fua i ai lau....

Lau Afioga i le Minisita o Galuega aemaise foi o si o matou nuu o Leulumoega, le auala lea na tatou asia ua e matauina le matua faaletonu, e oo mai lava i le aso, ua silisili atu le matua faaletonu. O le auala lea e agai atu i le maota o le Faafeagaiga o le ekalesia Metotisi i Leulumoega seia agai atu lava...o le matou tatalo e tuu atu pea i le Minisita o Galuega, e faapena ona e silasila i le vaega lea. A o i lava foi e muta ai le auala, o lo o i ai nai aiga o lo o tatalo mai i le latou moli eletise, pe a ma le lima nai aiga o lo o faapena ona i ai, o le tatalo lena lau afioga i le Minisita.



Faaiu mai Nofoalii, o si o matou pitonuu o Vaialua, matou te tatalo atu pea lava lau afioga i le Minisita o le Siosiomaga. Ua uma ona ou taua ua faapena ona faaoo mai le tusi a le Matagaluega o le a omai e asia, o lea lava ou te le i maua i lenei taimi po o le a se taunuuga. Ae tuu atu lava i ou tafatafa o lau afioga i le Minista, o i lo o nofoia e le susuga i le faafeagaiga o le ekalesia Penetekoso ma le mamalu o le ekalesia. E le atoa se limasefulu iata ae taunuu i le isi vaega lea ua uma ona i ai le taligalu. Ae i ai lou talitonuga, aua fai mai le mau, e ala ona fai taligalu, e puipuia mai ai aseta a le Malo. O a aseta a le Malo? O aualatetele, ae o le tele foi ia o le aoga, o le mau ai o tagata ia, aua o latou eleele ia o lea ua taofia mai ai le afaina o aseta ia a le Malo. E pau lea, e tuu atu loa i lau afioga i le Minisita, se i faapena ona i ai taligalu e malutia mai ai eleele ia ma nai aiga o loo nofoia lea vaega e le atoa se 50 mita o manaoga ia o le itumalo ma lo'u talitonuga ua ou tavave aua o lea ua fufuli mai o le tatou tala o le tupe le la foi tausaga ae iai lou talitonuga e leo faapena ona tagofia e le tatou tala faatatau o le tupe o lenei tausaga 2022/2023 a ua tuu atu , o le manatu paia o Sooaemalelagi ma alo o Tamaalelagi , paia ia te oe Itu o le Togi fetalaiga Alepia mamalu ia te Leulumoega o oe o le fetalai faavae le tapuaiga foi i lau susuga ile alii matua lau susuga Tanuvasa laau na fausia ma le nofo matafale le aiga Sa Tanuavasa paia le aiga Sa Tuala le afio ile fofoga o le Vai , fale fa o le aiga aemaise foi le mamalu ia te le Faleaana o le tatou sao lena malo tapuai o le tatou sao lena aua le tala faatatau faaopopo o le tupe o lenei tausaga 2022/2023 manuia tele le faafofoga lau afioga ile fofoga fetalai manuai le maota manuia lo matou itu.

**FOFOGA FETALAI:** malo faafetai mo le saunoaga lau afioga ile sui mamalu Aana Alofi Nu 3 , poo lau afioga foi ile sui Minista lagolago o le Matagaluega o Aoga malo faasoa faafetai foi mo fautuaga i nisi foi mea o moomia e le itumalo o lou sao foi aua le tamaoiga lautele o le atunuu, malo faafetai, lea ua vaai atu lea ua fou mai le sa o le ia Salevalasi Faasaleleaga Nu 2 , tulai maia lau afiog ile sui mamalu.

**Afioga MAGELE SEKATI FIAUI (Faasalelega 2):** Ou te tulai ile ava ma le migao e tatau ai e faaaogaina lenei avanoa faaauo e molimoli atu ai se sao o si o'u itumalo ile tala faatatau o le tupe 2022/2023 ou te faafetai atu i lau afioga ile pule faamalumu a le fono usu a Samoa lau afioga ile fofoga fetalai lau afioga ile Papaliitele ua maua se avanoa o lenei usugafono ou te talitonu o lea ua mapu i sagaga le utuga a taufa a le tautai matapalapala e ala i le viiga ma le tatalo na e saunoa ai ile taeao ua fano e tapui ai lo tatou va tapuia ma lo tatou tama sili ile lagi momoli atu le agaga o le faafetai tele.

E muamua ona ou faatulou atu ile alo-fa o le maota fono o Samoa afio lau afioga ile fofoga fetalai , afio lau afioga ile sui Palemia ma minisita o le

Kapenta , afifio foi minisita lagolago, afio foi lau afioga ile sui taitai o lena itu ma sui mamalu o le palemene o Samoa , faatalofa atu foi lau susuga ile failautusi ma le sui failautusi o le fono aoao faitulafono o Samoa faapea le aufaigaluega o le Ofisa o le Fono malo faafetai mo le tautuaina o le fono usu a lo tatou atunuu , faapai atu foi ile paia o le aufaigaluega a le malo , Ofisa Sili o Pulega Matagaluega , Faalapotopotoga Tumaoti ma Pisinisi malo le tautua tuavae ma tautua tualima aua lo tatou malo ma le Palemene o Samoa.

Faapai atu foi ile paia o si ou itumalo Susuga i Faafeagai ma o outou Faletua, pulega mamalu a Alii ma Faipule i afioaga taitasi, afifio ai tupe ma ee paia i aiga ma tapaaui , Faleupolu o tofiga , Faletua ma Tausi , Sauao ma Tamaitai, malosi o le Nuu se i oo lava i fanau iti, faatalofa atu foi ile paia o si o'u itumalo o loo fita faafogafoga mai atunuu mamao , tapuai maia o le a sii lo tatou vaa ile tai aua so tatou sao ile tala faaopopo faatatau o le tupe.

Ou te fia faatalofa atu foi i soo se Samoa lava aemaise o uo ma e masani aemaise o i latou o si ou Ekalesia pele o loo tapuaia ma lagolagoina lo'u tulai ai i lenei taimi , faafetai tele le mafuta mai.

O paia o Samoa mai Vasa i Saua sei paia le Niuula o le Alataua mai mauga tetele seia paia mauga itiiti , ua taoto ao se ala ua oo, o se i'a foi ua taatia i malae ua uma ona a'isa ona manatu lea lau afioga ile fofoga fetalai o le a le toe asaina le lavelave o le vaosa aemaise o le tapuaiga a Samoa , tapuaiga mamala a Samoa nuunuu atu ia ia Tumua ma Pule aua o lo latou fatu aiga tausii, nei tausaga fou ua tatou aulia mai a new begining , new ideas , fresh start , fresh ideas le agaga lea o le faamalosiua i lenei taeao ile paia o le Palemene o Samoa taatia ia fatia ua sola manatu tatou te aoao faatasi mai le lesona o le tuanai tatou te taulai ile lumanai aua se ai o le tatou atunuu. Lau afioga ile fofoga o le fono se taimi saunoa lo matou taitai fono tusa ai ma le lipoti.

O nai vaega a ia e 2 ou te fiapai ai i ona tulaga aoao tetele ile matau ai i lenei tala faatatau faaopopo o le tupe e iai nai avanoa faigaluega mo avanoa foi ia o galuega faavaitaimi e taua ile lagona ma le mafaufau ona o le matau lava e faatuputeleina ma siiiisii le fuainumera o i latou o loo malaga atu i ia avanoa e manaomia foi le aufaigaluega malo faafetai.

Lua o le seleni lea ua faaopopo i le penisiona a tatou tagata matutua afai e moni le mau e afua mai mauga le manuia o tupulaga ma Nuu ia o le a le mea e tuu ai , o le a le mea e tuu ai le faasoala lima lelei , manatu foi e le taitai lava lea faamanuiaga mo tatou matua matutua o loo faia le faiva o le tapuai ma tatalo mo tatou malo faafetai mo le faatofalaiga i lea tulaga . Lau afioga ile fofoga fetalai ona ou oo mai i lea i nai talosaga e toe fia faaamanatu ua uma foi ona taua ae nao toe fia faaamanatu lava nei galo ile afioga ile Minisita o Galuega ia nai talosaga ia a si ou itumalo . O lenei itumalo e le tagisa lava pau a lea o nai vaega o le tulaga lea i le talosaga a

si ou Nuu i Safua ile patupatu sei tulou i luma o le faleoloa o le saina ua uma ona faaoo atu lau afioga ile Minisita o le 2020 na faaoo atu ai le talosaga lea se patupatu lea lava ua matauina lea foi ua faagasolo lenei tausaga , na ona taoto atu faapena o lea ua uma ona e asia ma pasia foi tulaga e faataoto ai lea foi faamoemoe ae na ona toe faamanatu i lau afioga ma le Matagaluega amatalia ai galuega o lenei tausaga. O auala galue o si ou Nuu i

**FOFOGA FETALAI:** ia malie le sui mamalu sei tuu atu le avanoa ile Minisita o Galuega Tetele.

**Tofa Hon Olo Fiti Afoa Vaai:** Malie lau afioga i le... e faamalulu atu ile afioga ile sui mamalu e lei oo atu se talosaga i se patupatu ile tausaga 2020 pe ... a ua galo foi ia te a'u ,poo se isi o Minista o le la itu na e talosaga iai , aua o le faigapalota o le 2021.

**FOFOGA FETALAI:** lau afioga ile sui mamalu sei toe faasao mai lea mea.

**Afioga MAGELE SEKATI FIAUI:** Faafetai lau afioga ile fofoga fetalai ia lea foi e manino le saunoaga a le Minista o lea foi ou te taofi o le tausaga a lea na faaoo ane ai i Salafai le matou talosaga la foi e masalo lae maua foi le kopi e mafai ona faaoo atu pe afai o le tulaga , ia faafogafoga mai le Matagaluega e leai foi se lagona e faatautee i tulaga e pei , ae o lea e manino le saunoaga a le afioga ile Minisita.

**FOFOGA FETALAI:** ia sei toe tulai mai le Minisita o Galuega Tetele.

**Tofa Hon Olo Fiti Afoa Vaai:** Ia lea manino o le faigamalo o le road show lea sa agai i ai lau talosaga ae toe aumai se talosaga fou i le faigamalo lea ua i ai nei.

**FOFOGA FETALAI:** ia manaia lena toe tapena se isi talosaga fou , faaauau mai le saunoaga.

**Afioga MAGELE SEKATI FIAUI:** Ua lelei faafetai tele lau afioga ile Minisita e uma loa faaoo atu loa le aoauli nei le talosaga nei a le matou Nuu la faamolemole lau afioga o le lagona lava ua leva foi ona tofafa le Nuu i lenei fuafuaaga nei mea ane ua tupu se faafitauli ao lea ua uma ona faaoo atu nai vaega ia manatu foi e iai ona.....ua uma ona faataunuaina ou te leiloa pe na oo atu ni talosaga ae faafetai lea ua maua lou finagalo . O nai auala galue ia o si matou Nuu i Iva ma Salelavalu manatu lau afioga ile Minisita saunoa foi nisi o sui mamalu faaoo tau utiuti

ma tau faasoaso le faasoae a mafai a na ona faalaulelei a ua fia o i uta o matou tagata e galulue aemaise o le tapenaina o le lauuta mo poloketi leni o le miliona ua agai mai ua faigata a ma faatutugata le o i uta ona o le leaga tele o auala o le talosaga lea nao na taoto atu faapena ao lea ua faagasolo mai foi polokalama o le miliona o le fesoasoani tele i nisi o manaoga o si ou itumalo e momoli atu le agaga faafetai tele . O le vaega mulimuli o lea foi ou te taofi matou fesoatai foi ma nisi o si matou Nu'u si o tatou Nu'u lea i Salelavalu e iai le latou talosaga ua uma ona faaoo atu lau afioga ile Vai e fia pamu i uta o Salelavalu a e afio iai lau afioga puna ia o le vai nai uta iina pei o le puna o le vai la i o Oritana ae e manaomia la sina pamu e fia pamu ai le vai iina oute talitonu o le a foia le tele nisi o faafitauli e le gata i lo'u itumalo ao le faasoasoina foi o le suavai o lena itu o le tatou motu tele i Salafai pe a faapea e faataunuaina lea faamoemoe taua. O le isi vaega manatu o lau afioga foi lea ia Minisita o Malaevaalele e fia momoli atu pea se tuualalo tusa ai ma le auaunaga i lea foi nofoaga taua o le tatou atunuu . E iai le po le aso Gafua e leo ananafi ao le aso Gafua atu i tua sa ou iai ile malaevaalele faaee foi nisi o aiga malaga mai , o le faafitauli o le itu lea foi agai ai tagata i totonu o le a o i Niu Sila ma atunuu e mamao e iai se feteenaiga iina , saunoa mai , o lea tutu tagata ma telefoni e pue atu ia ata o latou aiga ia ua malaga i fafo sa ou tutu ai foi au ia ma la'u telefoni ae saunoa mai le tamaitai sa tu iina i se auala a e lei faamalieina ai le mamalu o le atunuu , telefoni ia faasaga mai e le faatagaina , sa mataitu ia aga foi o lena afiafi ma tulaga faapena ae na tauau lava ina tupu ai le faafitauli ina ua agai mai se tasi o uso ona faapena loa ona tau feteenai ma sia foi tamaitai faigaluega ona ou oo atu loa lea iai ile tamaitai lea, ua valaau foi i sikulati e malaga mai e fesoasoani ile faafitauli ma ou talanoa atu loa lea iai e faamalulu ile atunuu leaga nao le afaigaluega lea malamalama ile tulafono lea e leo manino le atunuu ile tulafono o le faasa o telefoni ma le tapue o ata ile nofoaga lea ae o le fesoasoani afai e leai se mafai ona fai se faailoilo foi lele i le nofoaga tonu lea e faasa aona pue se ata pe faasa poo lea lava le tulaga e faasa i luga o se vaega o le nofoaga leni ina ia mafai ona taulai ai le sialsila a le atunuu ina ia faigofie ina ia aua nei iai se feteenaiga , ona e leai ma se faailoilo o lea e faasea mai ile tapue atu o ata ae leo manino le atunuu lautele i le vaega lea nao se tuualalo se vaega foi e fesoasoani ile auaunaga ae na lelei a meauma i lena afiafi , faamalie foi ile afaigaluega malamalama foi lo latou finagalo o tulaga lava e ao ona faaleleia mo le agai luma . Ona oo mai lea o se faamatalaga ile Minisita o Fesoataiga faaopoopo lava foi le lagona i le faafitauli lava lea o le coverage i le motu tele i Salafai aemaise foi o le nofoaga i si o matou nuu ma... ia ua matua leaga faia lava. Sa le i faapea muamua, sa le i faapea muamua ao le taimi leni, ua oo lava i se post foi lele o le surf i luga o le internet, o se valaau i fafo ua matua le mafai lava.

Na ou valaau mai lea i le Kamupani Telefoni, ma faailoa i ai le faafitauli, ae sau le tali, e sao oe, o le itu lena, e matua leaga lava le coverage a matou i ina. A o le lagona foi lea, e le i tupu muamua. Sa lelei lava muamua, ae o lea ua i ai nai faaletonu ia, se i silasila ane i ai lau afioga i le Minisita. Ou te manatu e faapea foi le tele o nofoaga i le motu tele i Salafai. Ia ae o le talosaga i lau afioga, pe le mafai ona faatu se pou i i i lou itumalo e fesoasoani ai i la lea vaega aua na saunoa mai le sui na o ma talanoa, o le pou i Salelologa, ao le isi pou masalo o o i Tuasivi po o mamao atu. Ia ae o i i lou itumalo, ia e pei o i o le ogatotonu lemu o le pito o Faasaleleaga, ia pe le mafai ona faatu ai sina pou i ina, o la e tele fanua. E faatu fua foi, e faatu ai se pou i ina, ina mafai ona fesoasoani i le faafitauli lenei. O le atugaluga mo le agai i le lumanai, ia ina ne i te i ua alu alu ae toe tupu se faaletonu ma se faalavelave, ia e taofia ai ma le mafai ona faaauau aoga ma galuega ma tulaga faapena, motu la matou ma le faamanuiaga lena, pe a faapea e le faaleleia la lea tulaga. Ia o le fesoasoani atu lea i lau afioga i le Minisita, se i silasila ane i lea tulaga.

Ia, lau afioga i le Minisita o Femalagaiga, ia e faaopoopo lava le lagona i le tulaga lea e i ai le faafitauli i tatou Visa mo Niu Sila. Ua tele Visa o tagata o si ou itumalo ma isi foi tagata ua ou fesoasoani i ai. Ia, i tausaga ua mavae ua fai lava si faaletonu, ae i ai lau Visa na taumafai nei i le tausaga lea na tea nei o Setema, Aokuso i taimi faapena, ia ua tupu loa le faaletonu. O lea foi na maua i nisi o saunoaga e faapena foi ua 7 masina ia ao faatalitali lava le Visa o si faletua lea sa tau apalai, ia pe o le a se fesoasoaniga? Ia mo si o tatou atunuu mo lea vaega.

O lea ua matau ua sui ia le Pulega a Niu Sila, lea foi ua matau ua pale mai se tasi o alo o si o tatou atunuu i le Sui Palemia. Ia pe le mafai ona toe talatalanoa ma faatalatalanoa nai vaega ia e faaleleia mo si o tatou atunuu.

O le lona 2 lau afioga, o le va lea o tatou ma Amerika Samoa. O lea ua matauina, ua oo lava i kilia ia a Leoleo, Police Clearance, ua oo lava i fanau pepe tulou, ua fai kilia a Leoleo mo Amerika Samoa e malaga ai mo Pemitā ma tulaga faapena. Ia o lena e i ina le tofa ma le faautaga, ae o nai tamaiti nei o lea ua oo lava i tamaiti pepe o lea e susu i o latou tina, ae o lea manao mai le kilia e ave ai, ae e leai se solitulafono foi lea... e pei e na o nai lagona e... se i silasila ane i lena itu pe o le a se fesoasoaniga i lena mea, ia ae o lea e sau le kilia a Leoleo, e tutusa lelei lava le kilia a Leoleo le tau o le tagata matua ia ma lenei lava alualutoto.

Ia, lagolagoina ia le review ma le workforce plan. Ua tele saunoaga i alo ma fanau ia ua maea mai aoga e leai ni galuega e o i ai. Ae ou te manatu e i ai le Faiga Faavae a le tatou Matagaluega foi lea e serve ai le bond a alo ma fanau ia e foi mai e 2 tausaga ea pe 3. Se i silasila ane lava pe le o se tasi lea o vaega lea e toa ai nai a tatou alo ma fanau lea e i ai le toa lea. Pe le mafai ona talatala lea avanoa, ia pe sui foi i se isi tulaga e i ai le tulaga lea. Ia ae allow le avanoa i nai Private Sector foi lea e mafai ona faasoa i ai

ia nai a tatou alo ma fanau, ia nai lo le le mafai ona taofiofia i i Faiga Faavae lea a le tatou Matagaluega... O se tasi lena o vaega o lea e pei ona matauina ina ia mafai... ia aua o le isi mea e matauina, ia e uma loa ona serve le Bond a nisi alo o le atunuu, ia sue loa le avanoa i le Pisinisi ma le Private Sector foi lea e lelei atu le totogi ma tulaga faapena. Ia ae pe le o le avanoa ma le taimi lelei lenei, se i toe review ane ai ma lena Faiga Faavae, ia ma fai se tulaga talafeagai e fetuutuunai ai foi mo lea faafitauli.

Ia lau afioga i le Fofoga Fetalai ona ou oo mai loa lea i le tulaga lea o le Poloketi lea o le Miliona. E muamua faamauina le faafetai tele i le Minisita o Punaoa Faalenatura ma Siosiomaga ona o le vave ona tali atu i le talosaga a si o matou itumalo, e ala i le fanua lea o le matou nuu lea ua o matou lisiina. Ia e ui lava o le fanua o si o matou nuu ae o lea ua o matou toe lisiina, ae e leai se mea o i ai. A ua la ua faatino ai ia le matou Ofisa ma tulaga faapena, ia faafetai tele lava, faafetai tele lava mo lea vaega, ia o la ua vave ona faatino ai ia le matou fuafuaga lea mo le miliona.

Ia o le faamoemoe lea lau afioga i le Fofoga Fetalai e matua lagolagoina e lenei itumalo. O le silasila mamao a lenei itumalo o le faamoemoe lea o le a aveesea ai le ola faalagolago o aiga o le tatou atunuu. Ia o le a foia ai le le tagolima ma o le a siitia maualuga ai ia le tulaga lautele o le tatou atunuu, ia e ala i atinae ia ma aseta o le a tutupu mai i totonu o itumalo taitasi ia ona o le faamoemoe lenei. O se faamanuiaga, ma o se avanoa faaauo, ia o le lagona lena o lenei itumalo e faafetai ai, ia i le Faigamalo ia aemaise o le amataga o le e ana ina ia le Poloketi, ia mo le tou onosai i lenei faamoemoe. E tele faafitauli e pei ona saunoa ia sui usufono mamalu o le Palemene, o so o se mea fou lava e faapena. Ia ae o lo outou Matagaluega o lo o tu i le foemua, ina ia mautinoa e tau lau o le faamoemoe lenei. O paia o itumalo, e malu ai le poloketi lenei ia aua se manuia o le tatou atunuu. Ia e momolia tu ai le faafetai tele i le Minisita o Tina ma Tamaitai ma le Matagaluega, ia aemaise foi le Minisita o Tupe o lo o ua vaaia ia le Matagaluega i le taimi nei.

Ia lau afioga i le Fofoga Fetalai ia e faamuliga se manatu i si tamai mataupu lea, i le tulaga lea i le tausia o le Aso Sapatu, ia ma le faamamaluina o le aso lea. Ia e molimauina lava i le Aso Sa na tea nei pasi atu i se tasi o nofoaga i... ia foi lea ia aua o lea ua tatala ia pisinisi ma faleoloa ma tulaga faapena, ia ae faanoanoa lava i le leotele o le laau i le faleoloa, ia ao pese foi ia faasalamausau pese faalelaloagi ... Ia e faapena se vaivaiga o lenei itumalo, aemaise lava i nofoaga lautele nei lau afioga i le Fofoga Fetalai. Ua lava ia le sueina o tatou tupe e soli ai le Aso Sa, ao nisi vaega ma nisi uiga e le migao i le Aso Sa, ia o le agaga lena e tau avatu ai se vaivaiga, pe le tatau ona fai sina Tulafono e faasa ai musika nei i le Aso Sa.

Ia aemaise o taavale e feofeoai lava ma... ia e pule lava Sitafune i le la o lona sa. Ia o aiga foi, ia e mautinoa lava tulaga faapena o aiatatau, ao

nofoaga faitete e o i ai le atunuu, ia i faleoloa ma tulaga faapena, ia o le agaga lena, e tatou te tausia le Aso o le Alii. O le Aso o le Alii ia mamalu, faamanuina ai foi ia tatou ma le tatou atunuu.

Ia, lau afioga i le Fofoga Fetalai, ia o le a seu i fanua ia le vaa o le matou itumalo. Ia e faafetai atu ai i le tapuaiga a si ou itumalo, ia i tupu ma ee, ia e momoli atu le agaga faafetai tele lava, i la outou tapuaiga, ia ma la outou tatalo ia aua se taumafaiga o lo tatou sao i le tatou Malo ma ona faiva i lenei foi vaitau ua o tatou i ai.

Ia o le faapai atu lea i lau afioga i le Fofoga Fetalai, ia faafetai tele mo lo matou avanoa, faamanuia ia le Tama Faalelagi i lau afioga, aemaise o le faletua ma le aiga o tapuaia ou faiva. Ia fale i le Atua ia le faatofalaiga a lau afioga, aua ia le faafoefoeina o le Fonousu a Samoa, faapea foi ia le Palemene o Samoa ma ona sui usufono mamalu uma. Ia ia fale i le Atua ia le tofa faalele ma le tofa faaalualumamao, ia aua se manuia o le tatou atunuu o lo o faatalitali mai, ae ola le leo o Faasaleleaga 2, soifua ma ia manuia.

**FOFOGA FETALAI:** Malo, malo faafetai, malo foi malele ma saunoa i lau afioga i le sui usufono mamalu o Faasaleleaga Nu.2, ia aemaise foi o le afioga i le Minisita Lagolago o le tatou Matagaluega o Tupe. Ia malo lava le faasoa malo foi le lauga. Ia faafetai foi mo feau taumolimoli aemaise o le tatou ola faaleagaga, ia manaia foi le molimoli mai ia aua ia lo tatou atunuu o lo o faafogafoga mai.

Ia o lo o lava ia le tatou taimi mo se tasi o sui usufono e fia saunoa. Ia...

**Tofa Hon LAUOFO FONOTOE NUAFESILI PIERRE LAUOFO (Anoamaa 2):** Lau afioga i le Fofoga Fetalai, e matau atu toe o au nei ma le afioga i le Taitaifono o le Komiti o Tupe pe a...

**FOFOGA FETALAI:** Ia, e talitonu o lea e i ai nai sui usufono o lo o totoe i le Itu lea, ae afai e leai, ia atonu o le avanoa lea i lau afioga i le Taitai, ai atonu o lea ua matau atu, ia saunoa ia, o lou avanoa lenei.

**Tofa Hon LAUOFO FONOTOE NUAFESILI PIERRE LAUOFO:** Faafetai i lau afioga i le Fofoga Fetalai, atonu ua le o toe tele foi ia ni tatou minute ia ona alo foi lea o le Maota i le malologa i le aoauli. Ia ae faaoga nei minute o totoe e momoli atu ai le faamalo faapalepale i lau afioga i le Fofoga Fetalai, faatonufofolaia o le Fonousu a le atunuu. Ia faapena ona i ai pea le agalelei o le Atua i ou faiva i lenei foi tausaga fou ua o tatou aulia mai 2023.

Ia e momoli atu foi le faamalo i le la Itu o le Maota i le afio mai o le afioga i le Sui Palemia, ia faapea foi ia le auvaa o le Kapeneta, ia faapea le Sui Fofoga Fetalai ia ma afioga i Minisita Lagolago. Ia liliu mai foi i lenei

Itu o le malu, momoli foi le faamalo i le galulue i afioga i sui usufono, ia aua foi le faatinoina o le latou pitolaau o le agaia o le tatou Malo.

Ia faamalo foi le taupati mai o Ofisa Sili o Matagaluega ma Faalapotopotoga a le Malo i lenei foi aso Fono. Ia faapea foi le tapuai mai o le afaigaluega a lo tatou Malo, ia o lo o lagolagosua i galuega a le tatou Palemene. Ia e fia faafetaia foi le tapuaiga a le tatou atunuu i ona maota faitauina e afua mai i Matapama se i papai atu i le Siufanua i le atululuga i le oneone sinasina ma le sami ulaula a le tamaitai.

Le afifio o Tama ma Aiga, o Aiga foi ma latou Tama, Aiga o Tupu, Aiga o Nofo, ma Aiga o Papa. Ia faapea foi Tupua iloga o le atunuu, o lo o fetuunai ai ia muniao i le faautaga saili malo i ponaoo ma tulatoa, faleupolu tofia, le tupu, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Ia faamalo foi faafetai i le ee tapuai mai o Le Ao Mamalu o le Malo ma le Masiofo, ia faapea foi le Sui o Tofia ma le Faletua, ia tainane le tapuaiga a le afioga i le Faamasino Sili, Peresetene ma le vasega o Faamasino.

Sopoia le sami i le Itulagi o le motu tasi, i le paia ma le mamalu ia Sua ma Vaifanua, Fofō ma Aitulagi, Ituau Saole Saleaaumua ma le Launiu Saelua, faapea Nofo a Maopu ma upu Faleagafulu. Ia faapea foi le afio alii, le laau na amotasi, Faatuiolomotu ma le auvaa o tootoo ia ma upu i le motusa, ua faamalo le tapuai. Ia ou te fia faafetaia foi le tapuaiga a le Faigamalo a Amerika Samoa tapuaiga a le afioga i le Kovana Sili le Lutena Kovana faapea le kapeneta afio foi le Pesresitene ma Senetoa o le maota o le Senate tainane foi le afio i le afioga i le Afioaga i le Fofoga Fetalai ma sui usufono o le maota, le tapuaiga foi a le Faamasino Sili ma le vasega o Faamasino e le faagaloina le loto ma le agaga le tapuaiga le itupa gafua o le nafa na sema i le lagi, i taitai o Ekalesia ositaulaga ma auauna tofofi o le Atua o loo punoupunouai faalaausautia o tausoga i tafa e fia o Samoa ma atunuu e mamao e ala i lo latou tofi mai le Atua lau afioga ile fofoga fetalai lenei ua amatalia lo tatou folauga i lenei foi tausaga fou 2023 o le matou tatalo ia iai le agalelei o le Atua ia aua nei iai se peau e laga ia sao ma uli lo tatou faiga malaga taunuu ai ile siui o lenei foi tausaga ile alofa ma le agalelei o le Atua.

Lau afioga ile fofoga fetalai, tau amata atu nai manatu puupuu e le toe tele foi se lagona o lea ua sausi saunoaga o le maota sa faalogologo lava ma le totoa i le matagofie o saunoaga , mataupu laga o le mea ia nao nai manatu pupuu ia e fono faapipii foi i saunoaga ua opea i le maota.

E ioe ma talitonu le taofi i le vaitau malolosi o le fesuaiga o le tau o le taua o loo iai Europa i le taimi nei faapea foi ma faamai ua aafia ai le lalolagi o loo ua aafia ai le tamaoaiga o le lalolagi ma Samoa nei , e pei ona aumai ile folasaga a le afioga i le tamaitai Minisita o Tupe tusa ma ai ma le tala faaopopo o tupe i lenei tausaga fou pei o luitau malolosi ia ua mafua ai le siisii pea i luga o le taugata o le soifuaga sii le tau o oloa taumafa sii le tau



o oloa faufale sii le tau o le suauu ma isi oloa manaomia , ma aafia ai foi sesi vaega o tatou tupe faaleoleo ae laualuga a pe aliae mai ai foi ma se isi faafitauli o le le maua lea o nisi o oloa manaomia i totonu o le tatou atunuu ae laualuga nei aafiaga malolosi ma nei luitau malolosi e pei ona matau atu o le ona aafia lea o le maketi o tupe e fefaatauaiga o share ma tupe o le lalolagi o loo ua foliga mai ua agai atu ina aafia tele ai aemaise i atunuu malolosi tamaoaiga ile lalolagi o le mea e ao foi ona tatou mataitu , tatou sauniuni tatou i se aafiaga e ona tulai mai se taimi, lau afioga ile fofoga fetalai o se fesoasoani tele mo le faaleleia atili o le tatou tamaoaiga ua iai talitonu e tatau ona toe uunaia malosi lo tatou atinae o tagata tafafao maimoa mai ile atunuu aua e tasi lea atinae manuia ai le gata i Apia nei faapea foi afioga i tua aemaise Savaii faletalimalo mataaaga , mataaaga o loo faafoe e aiga taitoatasi ia faapea foi mataaaga o loo faafoe i lalo o le pule faamalumalua a Alii ma Faipule , matauina i nai masina ua tuanai talu ona tatala feoaiga aemaise lava masina ua tunai atu le tele foi o latou ua asiiasi mai i Samoa aofia ai ma nai tatou aiga , tele le seleni sa faapena ona tafe mai totonu o le atunuu , o le tulaga lea e avatu ai se manatu ile toe faaleleia ma toe unaia malosi o le tatou atinae lea o tagata tafafao maimoa mai. O faamaumauga ma lipoti e pei ona maua ao lei aafia i tatou ile koviti e 4 selau miliona tala maua e tatou tausaga mai le atinae lea , o le tulaga lena e pei ona iai a toe vaavaai atu la iai ua tele le faaletonu mai lena 2 tausaga o aafia tatou ile faamai o nai faletalimalo aafia foi tatou tamaoaiga faapea foi atunuu uma o le lalolagi , o se lagona foi lea e tatau ona toe faaleleia le tulaga lea ona e taua tele mo pisinisi laiti so se pisinisi laiti a e manuia ai foi i le atinae lea o tagata tafafao maimoa mai , a silasila foi la i tua manuia ai mo mea o tele o flea maketi i tafa ala faapena ona faatau ai e tagata tafafao mai nai latou fua o faatoaga aemaise mo niu ma isi latou fua o faatoaga faapena , faleaiga laiti, taavale afi o pasi ma isi uma ituaiga ia lau afioga ile fofoga fetalai ua vaai atu ile tatou taimi , ua tatau ai ona tatou malolo sei toe faaauau pea tatou toe foi mai.

**FOFOGA FETALAI:** ia faafetai measili o lea ua maua mai lau afioga, o lea ua tatou taunuu i le tatou taimi malolo, o le a faaauau le saunoaga pea tatou talii mai le malologa.

*Na faataatiaese Taulumaga a le Fono Aoaofaitulafono i le itula e 1:00 i le afiafi.*